

四庫全書

集部

欽定四庫全書

集部
文選補遺卷二十九

詳校官中書臣丁榮祚

助教臣常循覆勘

總校官中書臣朱鈐

校對官監丞臣張曾炳

謄錄監生臣史殿榮

欽定四庫全書

文選補遺卷二十九

元 陳仁子 輯

離騷

遠遊

遠遊者屈原之所作也屈原既放悲歎之餘
助觀宇宙陋世俗之卑狹悼年壽之不長於

是作為此篇思欲剗煉形魂排空御氣浮遊八
極後天而終以盡反復無窮之世變雖曰寓言

然其所設王子之詞苟能
充之實長生久視之要訣

屈原

悲時俗之迫阨兮願輕舉而遠遊質菲薄而無因兮焉

託乘

時證反

而上浮遭沈濁而汙穢兮獨鬱結其誰語

魚據

反

夜耿耿而不寐兮魂營營而至曙

耿耿猶微微不寐貌營營猶曰熒熒

亦耿耿之意

惟天地之無窮兮哀人生之長勤往者余弗及

今來者吾不聞

此章四言乃此篇所以作之本意也神仙度世之說無是理而不可期也審矣

屈子於此乃獨眷眷而不忘者何哉正以往者之不可及來者之不得聞而欲久生以俟之然往者之不可及則已末如之何矣獨來者之不得聞則夫世之惠迎而未吉從逆而未凶者吾皆不得以須臾反復熟攔而睹夫天定勝人之所極是則安能使人不為沒世無涯之悲恨此屈子所以願少須臾無死而僥倖萬一神仙度

世之不可期也嗚呼遠矣是豈易與俗人言哉

步徙倚而遙思兮

怊悵超昌兩反

怳

吁往反

而永懷

叶胡咸反

意荒

呼廣反

忽而流蕩兮心愁悽而

增悲

懷痛也

神儻忽而不反兮形枯槁而獨留內惟省以

端操兮求正氣之所由

知愁歎之無益而有損乃能反自循省而求其本初

漠虛

靜以恬愉兮澹無為而自得聞赤松之清塵兮願承風

乎遺則

列仙傳赤松神農時為雨師服水玉教神農入火自燒至崑山上常止西王母石室隨風雨上

下炎帝少女追之亦得仙俱去張良欲從赤松子遊即此也

貴真人之休德兮美往

世之登仙與化去而不見兮名聲著而日延

身隱而不可見獨有

名字可聞耳

奇傳說之託辰星兮羨韓衆之得一形穆穆以

浸遠兮離人羣而遁逸

傳說武丁之相辰星東方蒼龍之體心尾箕之星所謂大辰也

○莊子傳說得之以相武丁奄有天下衆衆維騎箕尾而此於列星音義云今尾上有傳說星是也羨念慕也韓終亦見列仙傳形容遠即上文與化去之意

因氣變而遂曾

增

舉兮忽神奔

而鬼怪時髣髴以遙見兮精皎皎以往來

叶音贊此亦上文化去形

遠之意髣髴見不誤也丹經所謂服食三載輕舉遠遊入火不焦入水不濡能存能亡長樂無憂者此也

超

氛埃而淑郵兮終不反其故都免衆患而不懼兮世莫

知其所如

氛昏濁之氣淑尤言其淑善而絕尤也此以上言所羨仙去之樂也

恐天時之

代序兮耀靈畢德而西征微霜降而下淪兮悼芳草之

先薦

今作零

聊仿佯

音芳羊

而逍遙兮永歷年而無成誰可

與玩斯遺芳兮長鄉風而舒情高陽邈以遠兮余將焉

所程

耀靈日也畢閔光貌言行之速也淪沈也零落也此一節自歎其將老而恐其學之不及

重曰

春秋忽其不淹兮奚久留此故居軒轅不可攀援兮吾

將從王喬而娛戲

嬉叶音虛

飡六氣而飲沆

胡朗反

瀝兮漱正

陽而含朝霞

叶音胡

保神明之清澄兮精氣入而麤

七胡反

穢除

軒轅黃帝名王喬周靈王太子晉也列仙傳好吹笙作鳳鳴遇浮邱公接之仙去六氣者陵陽子明

經言春食朝霞日始欲出赤黃氣也冬飲沆瀣北方夜半氣也秋食淪陰日沒以後赤黃氣也夏食正陽南方日中氣也并天地元黃之氣是為六氣也又曰日入為飛泉粗物不精也

順凱風以從避兮

至南巢而壹息見王子而宿之兮審壹氣之和德

南風曰凱

風南巢舊說以為南方鳳鳥之巢非湯啟桀之居巢也宿與肅通審完問

曰道可受兮而不

可傳其小無內兮其大無垠

叶魚堅反

毋滑骨而魂兮彼將

自然壹氣孔神兮於中夜存

叶才緣反

虛以待之兮無為之

先庶類以成兮此德之門

叶謀連反曰者王子之言也受心受也傳言傳也小無內

大無垠言無所不在也滑亂也而汝也壹專也孔甚也此言道妙如此人能無滑亂其魂則身心自然而氣之

甚神者當中夜虛靜之時自存於已而不相離矣如此則於應世之務皆虛以待之於無為之先而庶幾自成萬化自出蓋應成子之告黃帝不過如此實神仙之要訣也 聞至貴而遂徂兮忽乎

吾將行

叶戶郎反

仍羽人於丹丘兮留不死之舊鄉

至貴謂至妙之

言其貴無敵也仍因就也羽人飛仙也丹丘晝夜常明之處不死之鄉仙靈之所宅朝濯髮於湯

陽谷兮夕晞余目兮九陽吸飛泉之微液兮懷琬琰之

華英

叶於姜反湯谷見天問九陽舊說謂湯谷上有扶木九日居下枝一日居上枝亦寓言耳飛泉已見

上琬琰玉名

玉色頽

音若音經二反

以晚

晚入音萬

頽兮精醇粹而始壯

叶音莊

質銷鑠以爲

綽

約兮神要眇

與眇同

以淫放

叶音方頽美貌

一曰斂容貌晚澤也醇厚也粹不雜也質銷鑠所謂彫
解銷化也均約柔弱貌莊子藐姑射山有神人焉均約
若處子要眇深遠貌注縱也

嘉南州之炎德兮麗佳樹之冬榮山蕭

條而無獸兮野芳

與寂同

漠其無人載營魄而登霞兮掩

浮雲而上征

一作升上四句記時物也下二句言以此時昇仙而去載猶如也營猶熒熒也魄說

見九歌此言熒魄者陰靈之聚若有光景也霞與遐通謂遠也蓋魄不受魂魂不載魄則魂遊魄降而人死矣故修煉之士必使魂常附魄如日光之載月賈魄常檢魂如月質之受日光則神不馳而魄不死遂能登仙遠去而上征也

命天閭其開闔兮排閭闔而望余召豐隆使先

導兮問大

泰

微之所居集重陽入帝宮兮造旬始而觀

清都朝發軔於太儀兮夕始臨乎於

於其

微閭

排推也望余須

我之來也與騷經倚閭闔而望予者意不同矣豐隆已見騷經太微宮垣十星在翼軫北重陽者積陽為天有九重故曰重陽句始星名清都列子以為帝之所居也太儀天帝之庭於微閭周禮東北曰幽州其山鎮曰

閭

屯余車之萬乘兮紛溶與而並馳駕八龍之婉婉

苑今載雲旗之逶蛇

落水盛也

建雄虹之采旄兮五色雜而

炫燿

音縣曜

服偃蹇以低昂兮驂連蜷

巨負反

以驕驁

五到反服衡下夾轅兩馬也驂衡外挽騎奇奇

反

膠葛以

雜亂兮斑漫

莫半反

行而方行撰余轡而正策兮吾將過

乎句芒

膠葛雜亂貌一曰猶交加也斑駁文也漫衍無極貌句芒木神月令東方甲乙其帝太皞其神

句芒註云此木帝之居木官之佐自古以來著德立功

歷大皓以右轉兮前飛廉

以啓路陽杲杲其未光兮凌天地以徑度

太皓即太皞也始結芒罟

以畋以漁制立庖廚天下號之為庖犧氏飛廉見騷經徑直也

風伯為

去聲

余先驅兮氛

埃辟

必亦反

而清涼鳳凰翼其承旂兮遇蓐收乎西皇

西方

庚辛其帝少皞其神蓐收西皇即少昊也左傳金正曰蓐收

擘彗星以為旂兮舉斗

柄以為麾叛陸離其上下兮遊驚霧之流波

叶補基反斗柄北斗

之柄所謂杓也麾旗屬叛繚隸分散貌

晉暖暉

音愛速

其曠

儻莽兮召元武

而奔屬

燭

後文昌使掌行兮選署衆神以並轂

暖昧昧情也

日不明也元武北方七宿謂龜蛇也位在北方故曰元身有鱗甲故曰武文昌在紫微宮北斗魁前六星如匡

形

路曼曼

莫干反

其修遠兮徐弭節而高厲左雨師使僮

待兮右雷公而為衛

屬惡陵之意

欲度世以忘歸兮意恣

千

反睢

許鼻反

以担

居禁反

矯

內欣欣而自美兮聊愉娛以

淫樂

叶五教反度世謂度越塵世而仙去也恣睢放肆也担擔軒舉也淫樂樂之深也莊子執居無事淫

樂而勸是

涉青雲以汎濫游兮忽臨睨夫舊鄉僕夫懷余心

悲兮邊馬顧而不行

叶戶郎反邊旁也謂兩驂也

思舊故以想像兮

長太息而掩涕汜容與而遐舉兮聊抑志而自弭

屈原謂修

身念道得遇仙人託興俱遊周歷萬方升天乘雲役使百神而非所樂猶思楚國念故舊欲竭忠信以寧國家

精誠之至德義之厚

指炎神而直馳兮吾將往乎南疑覽方外之

荒忽兮沛濶

厚朗反

濫

以養反

而自浮

叶扶皮反南方丙丁其帝炎帝其神祝融

南疑九疑也沛流貌濶濫水盛貌

祝融戒而蹕御兮騰告鸞鳥迎處妃

張咸池奏承雲兮二女御九韶歌

叶居反

使湘靈鼓瑟兮

令海若舞馮夷玄螭蟲象

似兩反

並出進兮形蟠

於九反

蚪

而逶蛇雌蜺

五歷五結二反

便娟以增攄兮鸞鳥軒翥

草庶反

而

翔飛音樂博衍無終極兮焉

尤虔反

乃逝以徘徊

躡止行人御衆

也咸池堯樂承雲黃帝樂也又曰顓頊樂人曰有虞氏之樂無所稽考未詳孰是二女娥皇女英也御侍九韶已見騷經湘靈湘水之神也海若海神號莊子有北海若馮夷水仙莊子亦云馮夷得之以游大川又曰河伯也象國語所謂水之怪龍罔象也鰐蚪盤曲貌便娟輕麗貌撓纖也翥舉也博衍寬平之意焉語詞也舒

并節以馳驚兮連

敕角反

絕垠乎寒門

叶彌中反

軼

逸

迅風於

清源兮從顓頊乎增冰

連遠也

絕垠天之邊際寒門北極之門軼從後出前迅疾也北

方壬癸其帝顓頊其神玄冥北方地寒故有增積之冰

歷玄冥以邠徑兮乘間維

以反顧召黔羸而見之兮為余先乎平路

間維補引孝經緯曰天有

六間黥嬴舊說天上造化神名或曰水神皆怪妄之說不可考矣

經營四方今周流六

漠上至列缺兮降望大壑

大壑謂六合列缺天際電照大壑在渤海東實惟無底之

谷名
歸壑

下崢嶸而無地兮上寥廓而無天視儻忽而無見

兮聽惝怳而無聞

叶無

超無為以至清兮與泰初而為

鄰

崢嶸深遠貌寥廓廣遠也惝怳耳不諦也列子曰泰初者氣之始也莊子曰泰初有無無有無名屈子本

以來者不聞為憂而願為方仙之道至此則真可以後天不老而洞三光矣下視人世蠻貊之間百千蚊蚋須臾之頃萬起萬滅何足道哉何足道哉司馬相如作大人賦多襲其語然屈子所到非相如所能窺其萬一也

天問

晦菴朱氏曰天問者屈原之所作也屈原放逐彷徨山澤見楚有先王之廟及公卿祠堂

圖畫天地山川神靈琦瑋僞佻及古賢聖怪物
行事因書其壁呵而問之以潔憤懣楚人哀而
惜之因其論述故其大義不次序云爾○此篇
所問雖或怪妄然其理之可推事之可鑒者尚
多有之舊註之說徒以多識異聞為功不復知
其所以問之本意與今日所以對之明法至唐
柳宗元始欲實以義理為之條對然亦學未聞
道而誇多衒巧之意猶有離乎其間以是讀之
常使人不能無遺恨若補註之說則其麗雖不
知所擇入愈甚焉今存其不可闕者而悉以義
理正之庶
讀者有補

屈原

曰遂古之初誰傳道之上下未形何由考之

遂往也道
猶言也上

下謂天地也問往古之初未有天地固未有人誰得見之而傳道其事

冥昭瞢闇誰能極

之馮憑

翼惟像何以識之

冥幽也昭明也謂晝夜也瞢言晝夜未分也極窮也馮

翼氣氤浮動貌淮南子云天地未形馮為翼翼又曰未有人今何以窮極而知之○右二章四問今答之曰開闢之初其事雖不可知其理則具於吾心固可反求默識非如傳記雜書謬妄之說必誕者而後傳如柳子所說

明明闇闇惟時何為陰陽

三合何本何化

明闇即謂晝夜之分時是也穀梁曰獨陰不生獨陽不生獨天不生三合然後

生○此問蓋曰明必有明之者闇必有闇之者是何物之所為乎陰也陽也天也三者之合何者為本何者為化乎今答之曰天地之化陰陽而已一動一靜一晦一朔一往一來一寒一暑皆陰陽之所為而非有為之者

也然穀梁言天而不以地對則所謂天者理而已矣成
湯所謂上帝降衷子思所謂天命之性也是為陰陽
之本而其兩端循環不已者為之化焉周子曰无極而
太極太極動而生陽動極而靜靜而生陰靜極復動一
動一靜互為其根分陰分陽兩儀立焉正謂此也然所謂太極亦曰理而已矣圜則九重孰營
度之惟茲何功孰初作之九陽數之極所謂九天幹營

維焉繫天極焉加八柱何當東南何虧

叶苦家反幹說
天較端皆是車

較之內以金為筦受軸者維繫物之縻也天極謂南北
極天之樞紐常不動處譬車之軸也蓋凡物之運者其
較必有所繫然後軸有所加故問此天之幹維繫於何
所而天極之軸何所加乎河圖言崑崙者地之中也地
下有八柱互相牽制名山大川孔穴相通素問曰天不
足西北地不滿東南註云中原地形西北高東南下今

百川滿湊東之滄海則東西南北高下可知
故又問八柱何所當值東南何獨虧闕乎
九天之際

安放

上聲安屬

注

隅隈多有誰知其數

九天即所謂圜則九重際邊也放至

也屬附也隅角也○右三章六問今答曰或問邵子曰
天何依曰依乎地地何附曰附乎天天地何所依附曰
自相依附天依形地附氣其形也有涯其氣也無涯詳
味此言屈子所問昭然若發矇矣但天之形元如彈丸
朝夜運轉其南北兩端後高前下乃其樞軸不動之處
其運轉者亦無形質但如勁風之旋當晝則自左旋而
向右向夕則自前降而歸後當夜則自右轉而復左將
旦則自後升而趨前旋轉無窮升降不息是為天體而
實非有體也地則氣之查洋聚成形質者但以其束於
勁風旋轉之中故得以几然浮空甚久而不墜耳黃帝
問於岐伯曰地有憑乎岐伯曰大氣舉之亦謂此也其
曰九重則白天之外氣之旋轉益遠益大益清益剛究

陽之數而至於九則極清極剛而無復有涯矣豈有營度而造作之者先以幹維繫於一處而後以軸加之以柱承之而後天地乃定位哉且曰其氣無涯則其邊際放屬隅限多少固無得而言者亦不待辨說而可知其妄矣東南之虧乃專以地

天何所省十二焉分日月安

屬列星安

省合也此問天與地合會於何所十二辰誰所分別乎

屬誰陳列也○上章所問天何所屬并地而言此所問乃為天地相接之處何所省也今答曰天周地外其說已見上矣非省乎地之上也十二者自子至亥十二辰也左傳日月所會是謂辰註云一歲日月十二會所會為辰十一月辰在星紀十二月辰在元枵之類然此特在天之位耳若以地而言之則南面而立其前後左右亦有四方十二辰之位焉但在地之位一定不易而在天之象運轉不停惟天之鶉火加於地之午位乃與地

合而得天運之正耳蓋周天三百六十五度四分度之一周布二十八宿以著天體而定四方之位以天繞地則一晝一夜適周一匝而又起一度日月五星亦隨天以繞地而惟日之行一日一周無餘無欠其餘則各有遲速之差焉然其懸也固非綴屬而居其運也亦非推挽而行但當其氣之盛處精神光曜自然發越而又各自有次第耳列于天積氣耳日月星辰亦積氣中之有光曜者張衡靈憲曰星也者體生於地精成於天列居錯峙各有收屬

出自湯

賜

谷次于蒙汜

似

自明及晦所

此言皆得之

行幾里

次舍也汜水涯也書宅嵎夷曰賜谷即湯谷爾雅西至日所入為大蒙即蒙汜○此問一日之

間日行幾里乎答曰湯谷蒙汜固無其所然日月出水乃升於天及其西下又入於水故其出入似有處所而所行里數歷家以為周天赤道一百七萬四千里日一晝夜而一周春秋二分晝夜各行其半而夏長冬短一

進一退又各
以其十之一
夜光何德死則又育厥利維何而顧菟在

腹夜光月也死其晦也育生也月之生也○此問月有

何德乃能死而復生月有何利而顧望之菟常居其

腹乎答曰歷家舊說月朔則去日漸遠故魄死而明生

既望則去日漸近故魄生而明死至晦而朔則又遠日

而明復生所謂死而有復育也此說誤矣若果如此則

未望之前西近東遠而始生之明當在月東既望之後

東近西遠而未死之明却在月西矣安得未望載魄於

西既望終魄於東而逝日以為明乎故唯近世沈括之

說乃為得之蓋括之言曰月本無光猶一銀丸日耀之

乃光耳光之初生日在其傍故光側而所見繞如鈎日

漸遠則斜照而光稍滿大抵如一彈丸以粉塗其半側

視之則粉處如鈎對視之則正圓也近歲王普又申其

說曰月生明之夕但見其一鈎至日月相望而人處其

中方得見其全明必有神人能凌倒景旁日月而往參

其間則雖弦晦之時亦得見其全明而與望夕無異耳
以此觀之則知月光常滿但自人所立處視之有偏有
正故見其光有盈有虧非既死而復生也若顧菟在腹
之間則世俗桂樹蛙鳬之傳其惑久矣或者以為日月
在天如兩鏡相照而地居其中四旁皆空水也故月中
微黑之處乃鏡中大地之影略有形似而非真有是物
也斯言有理足破千古之疑

女岐無合夫

扶

焉取九子伯強何處惠

氣安在

叶音紫

○女岐神女無夫而生九子伯強大癩瘦鬼也所至傷人患順也惠氣謂和氣○此章

所問三事今答曰天下之理一而已而有常變之不同
天下之氣亦一而已而有逆順之或異夫乾道成男坤
道成女凝體於造化之初二氣交感化生萬物流形於
造化之後者理之常也若女岐之生稷契則又不
可以先後言矣此理之變也女岐之事無所經見以考
其實然以理之變而觀則恐其或有是但下文復有女

岐易首之問又未知果如何耳釋氏書有九子母之說
疑即謂此然益荒無所考矣惠者氣之順也癘者氣之
逆也以其強暴傷人故為之名字以著其惡耳初非實
有是人也氣之流行充塞宇宙其為順逆有以天時水
土之所值有以人事物情之所
感萬變不同亦未嘗有定在

何闇而晦何開而明角

宿未旦曜靈安臧

與臧同○闇開戶也開闢戶也陰闇
而晦陽開而明角亢東方星旦明也

曜靈日也○此問何所開闇而為晦明且東方未明之
時日安所藏其精光乎答曰晦明之間前婁發之其實
亦陰陽消息之所為耳陽息而闇則日出而明陰消而
闇則日入而暗又何疑乎角宿固為東方之宿然隨天
運轉不常在東古經之言多假借也日之所出乃地之
東方未旦則固已行於地中特未出地面之上耳○明

叶音

不任汨鴻師

一作

何以尚

可音

之僉曰何憂何不

課而行之

鮠事見尚書汨治也鵠大水也師衆也尚舉也餘衆也課試也○問鮠才不任治鵠水衆

人何以舉之堯知其不能而衆人以為無憂堯何不且小試之而遽行其說也答曰鮠之才可任治水當時無過之者故衆舉之堯則固知其方命圯族而不可用矣四岳又請姑且試之故堯不得已而用之耳鵠龜

曳銜鮠何聽

叶平聲

馬順欲成功帝何刑焉

鵠龜事無所見舊說鮠死

為鵠龜所食鮠何以聽而不爭乎特以意言之耳詳其文勢與下文應龍相類似謂鮠聽鵠龜曳銜之計而敗其事然若且順彼之欲未必不能成功舜何以遽刑之然若此類無稽之談亦無足答矣永遏在羽

山夫何三年不施伯禹腹鮠夫何以變化

叶音麾○永長也遏猶禁

止也羽山在東海中施謂刑殺之也左傳乃施邢侯此問鮠功不成何但囚之羽山而不施以刑乎禹鮠子也

腹懷抱也。誇曰：出入腹我。○此又問禹自少小習見鯀所為何以能變化而有聖德乎？答曰：舜之四罪皆未嘗殺也。程子以為書云：殛死，猶言殺死。蓋聖人用刑之寬，例如此，非獨於鯀為然。若禹之聖德，則其所秉於天者，清明而純粹，立習於不善，所能變乎？**纂就前緒，遂成考功，何續初繼業而**

厥謀不同

纂集也。緒，絲端也。○此問禹能纂代鯀之遺業而成功，何繼續其業而謀乃不同如此？

答曰：鯀禹治水之不同，事見洪範。蓋鯀不順五行之性，築隄以障閘下之水，故無成。禹則順水之性而導之，使下，故有功。書所謂決九川，距四海，濬畎澮，距川，孟子所謂禹之行水得水之道而行，其所無事是也。程子曰：今河北有鯀隄，而

無禹亦一證

洪泉極深，何以賓

與填同

之地方九則何

以墳

叶數之。洪泉，即洪水。九，則謂九州之界如上所謂連反。園，則也。墳，土之高者。○此問洪水氾濫禹

何用寘塞而平之九州之域何以出其土而高之乎答曰禹之治水行之而已無事於寘也水既下流則平土自高而可宮可田矣若曰必寘之而后平則是使禹復為鯀而父子為戮矣柳子對曰行鴻下潰厥丘乃降烏填絕淵然後夷應龍何畫河海何歷叶音勒○有鱗曰蛟龍有翼曰應龍于土此言是也歷過也山海經禹治水有應龍以尾畫地即水泉流通禹因而治之柳子對曰胡聖為不足反謀龍如春鍾究勤而欺盡厥尾鯀何所營禹何所成康回憑怒墜地何此言得之矣

故以東南傾

鯀禹事已見上六章此不復答舊說康回共工名也憑盛滿也列子共工氏與顓頊

爭為帝怒而觸不周之山折天柱絕地維而天傾西北日月星辰就焉地不滿東南百川水潦歸焉此亦無稽之言不九州安錯川谷何洿東流不溢孰知其故

錯置也洿

深也水注海曰川注川曰谿注谿曰谷○此章三問今
答曰九州所錯天地之中也川谷之滂衆流之會也不
溢者列子曰渤海之東不知幾億萬里有大壑焉實惟
無底之谷名曰歸墟八紘九野之水天漢之流莫不注
之而無增無減莊子曰天下之水莫大於海萬川歸之
不知何時止而不盈尾閭泄之不知何時已而不虛柳
子曰東窮歸墟又環西盈脉穴土區而濁濁清清墳墟
慘䟽滲渴而升充融有餘泄漏復行器運散激又何溢
焉三子之言通相祖述而柳又明歸墟之泄非出之天
地之外但水入於東而復繞於西又滲縮而升乃復出
於高原而下流於東耳此其說亦近似然以理驗之則
天地之化往者消而來者息非以往者之消復為來者
之息也水流東極氣盡而散如沃焦釜無有遺餘故歸
墟尾閭亦有沃焦之號非如未盡之水山澤通氣而流
窮注不

東西南北其修孰多南北順墮

安

其行幾何

修長也墮

狹而長也行餘也○此問四方長短若何若謂南北狹而長則具長處所餘又計多少也答曰地之形量固當有窮但既非人力所能遍歷斧銲所能推知書傳臆說又不足信唯靈憲所言八極之廣原於歷算若有據依然非專言地之廣狹柳對崑崙縣圃其尻與居同安在增直謂其極無方則又過矣

城九重其高幾里

縣音玄○崑崙縣圃見騷經崑崙據水經在西域一名阿耨達山河水所

出非妄言也但縣圃增城高廣之度諸怪妄說不可信耳

四方之門其誰從焉西北

辟啓何氣通焉

補注引淮南子說崑崙虛旁門有數百西北隅開門以納不周之風今不敢信

日安不到燭龍何照

叶之告反

羲和之未揚若華何光

舊註以為

天之西北幽冥無日之國有龍銜燭而照之具有日處日未出時人有若木亦華照地也夫日光彌天其行匝

地固無不到之處此章所問尤足兒戲之語不足答何所冬暖何所夏寒焉有石

林何獸能言

答曰南方日近而陽盛故多暖北方日遠而陰盛故多寒今以越之南燕之北觀之

已自可驗則愈遠愈偏而有冬暖夏寒之所不足怪矣石林未詳禮曰猩猩能言不離禽獸今南方山中有之

焉有龍虬負熊以遊雄虺九首儵忽焉在

叶音紫

何所不

死長人何守

虺蛇屬爾雅博三寸首大如擘儵忽急疾貌招魂說南方之宮雄虺九首往來儵忽

謂此不死之人則山海經淮南子屢言之固未可信然俗傳山中有人年老不死子孫藏之難窠之中者亦或有之不足怪也長人則國語所謂防風氏守封禺之山者山今在湖州武康縣

靡萍九衢臬華

安居靈蛇吞象厥大何如

靡萍未詳何物九衢言具枝九出山海經有四衢五衢之

語是也桑麻之有子者山海經云浮山有草其葉如桑
又云南海內有大蛇身長百尋其色青黃亦黑食象三
年而出其骨註云南方蟒蛇亦吞鹿消盡乃
自絞於樹腹中骨皆穿鱗甲間出亦此類
黑水玄趾

三危安在

叶音紫

延年不死壽何所止

黑水三危皆見禹貢玄趾未詳索問

曰真人壽敵天地無有終時至人益具壽命而強亦
歸於真人聖人形體不敵精神不散亦可以百數
鯨

魚何所魑

祈

堆焉處羿焉彈日焉焉解羽

鯨魚鱗也一云陵鯨有四

足形似鼃而短小出南方山海經西海中近列姑射山
有陵魚人而人手魚身見則風濤起北號山有鳥狀如
雞而白首鼠足名曰魑在食人彈射也淮南言堯時十
日並出草木焦枯堯命羿仰射十日中其九日日中九
鳥皆死墮其羽翼政留其一也春秋元命苞三足鳥
者陽精也柳云山海經曰大澤方千里羣鳥之所生及

所解穆天子傳曰北至曠尔之野飛鳥之所解其羽舊說非是按今唯陵鯉人所共識其餘則有無不可知而彈日之說尤怪安不足解解羽如柳說則別是一事然如舊說為日中之鳥而借解羽二字以問於義亦通顧亦無足解耳

禹之力獻功

叶音

降省下土方焉得彼僉

一作涂

山女而通之于台桑

此問禹以勤力獻進其功克因使省下土四方當此之時焉得彼僉

山氏之女而通夫婦之道於台桑之地乎書曰娶于塗山辛壬癸甲塗山在壽春東北濠州呂氏春秋禹娶塗山氏女不以私害公自

辛至甲四日復往治水

閔妃匹合厥身是繼胡為嗜不

同味而快鼃

飽

閔憂也言禹所以憂無妃匹者欲為身立繼嗣也下二句未詳

啓代

益作后卒然離孽

魚列反

何啓惟憂而能拘是達

益禹賢臣也作

為也。后，君也。離，遭也。璧，愛也。舊說禹以天下禪益，天下皆去益而歸啓，是代益作后也。於是，是有危不服，啓遂與之大戰于甘，故曰離。璧，問啓何以能思惟所憂而能代益伐扈，以達拘執之嫌乎？舊說如此，未知是否，不敢答也。

皆歸朕

一作射

籍

一作籍

而無害厥躬，何后益作革，而禹播

降

叶胡反

啓棘賓商，九辯九歌

叶巨反

何勤子屠母而死，分

竟地

叶音低

棘當作夢，商當作天，以篆文相似而誤也。蓋其意

本謂啓夢上賓於天而得帝樂以歸，如列子史記所言周穆王秦穆公趙簡子夢之帝所而聞鈞天廣樂，九奏萬舞之類耳。屠，母疑亦淮南所說禹治水時自化為熊，以通輳轅之道。塗山氏見之而慙，遂化為石，時方孕啓，禹曰歸我子於石，破北方而啓生，具石在嵩山見漢書註，竟地即化石也。此皆怪妄不足論，但恐文義當如

此
帝降夷羿草孽夏民胡舛一音石夫河伯而妻上彼雒

嬪帝天帝也夷羿諸侯戕夏后相者也草史也孽愛也言變更夏道為萬民憂患傳曰河伯化為白龍遊於

水旁羿見舛之眇其左目羿人夢與雒水神處妃交亦妄言也馮惡珖遙利決封禪是

舛叶時何獻燕肉之膏而后帝不若馮滿也言引滿也珖弓名爾雅弓以

蜚者謂之珖珖蜚蜚中也射禮有決註決猶闔也以象骨為之著右大臂指以鈎弦闔體也后帝天帝也若順也

言羿獵舛封禪以其肉膏祭天帝天帝猶不順羿之所為也柳子對曰今夫快殺鼎禘以慮飽營膏腴帝叛德

恣力胡肥台舌淫娶純狐眩妻爰謀叶謨何羿之淫而濫厥福

射草而交吞揆之寒淫見騷經眩感也爰於也言淫娶於純狐氏女眩惑愛之遂與淫謀殺

昇也射草禮所謂貫草之射左傳所謂蹲甲而射之微
七札焉者言有力也吞滅也揆謀度也言何昇之衆莠
勇力而其衆乃交進而吞謀之此即
騷經所謂淫遊佚畋而亂流鮮終者

阻窮西征巖何越

馬化為黃熊巫何活焉

此章似又言鮫事然羽山東裔
而此云西征已不可曉或謂越

岳墮死亦無明文左傳言鮫化為黃熊國語作黃能按
熊獸名能三足鼈也說者曰獸非入水之物故是鼈也
說文又云能熊屬足似鹿蓋不可曉或云東海人
祭禹廟不用熊白及鼈為膳豈鮫化為二物乎

咸播

秬

巨

黍莆藿

九

是營何繇并投而鮫疾修盈

秬黍黑黍
也說文黍

禾屬而莆疑即蒲字蒲水草可以作席
藿藟也崔同左氏云崔苻之澤餘未詳

白蜺嬰茀胡為

此堂安得夫良藥不能固臧天式從橫陽離爰死大鳥

何鳴夫焉喪厥體

舊註引列仙傳崔文子學仙於王子喬子喬化為白蜺而嬰弗持藥與之

文子驚怪引戈擊蜺因墮其藥俯而視之子喬之尸也須臾化為大鳥飛鳴而去事極鄙妄不足復論

萍

號

平聲

起雨何以興之撰體脅鹿何以膺之

舊說萍屏翳雨師名號呼

也興起也又言天撰十二神鹿一身八足兩頭獨何膺受此形體乎此章大抵荒誕無說今亦不論

鼇戴

山抃何以安之釋舟陵行何以遷之

鼇大龜也擊手曰抃舊註引列仙傳

有巨靈之龜背負蓬萊之山而抃舞事亦見列子下二句未詳

惟澆在戶何求于嫂何

少康逐犬而顛隕厥首女岐縫裳而館同爰止何顛易

厥首而親以逢殆

澆泥之子舊說澆無義淫泆其嫂往至其戶佯有所求因與淫亂夏少康

因田獵放犬逐獸遂襲殺澆而斷其頭顱倒也墮墜也
女岐澆嫂也言女岐與澆淫泆為之縫裳於是共舍而
宿止少康夜襲得女岐顛以為湯謀易旅何以厚之覆
澆因斷之故言易首不知何据

舟斟尋何道取

此荀反

之

湯與上句過澆下句斟尋事不相涉疑本康字之誤謂少康也

斟尋國名杜預云斟灌斟尋夏同姓諸侯相失國依於二斟為澆所滅其子少康為虞庖正有田一成有衆一旅遂滅過澆祀夏配天不失舊物旅謂一旅五百人覆舟言夏后相已傾覆於斟尋之國今少康以何道而能復取澆乎
桀伐蒙山何所得焉妹嬉上末下喜何肆湯何殛焉桀伐

蒙山之國而得妹嬉因此肆其情意故為湯所殛放之南巢

舜閔在家父何以鰥堯

不姚告二女何親

鰥古頑反○閔憂也無妻曰鰥姚舜姓也問舜孝如此父何以不為娶乎

堯妻舜而不告其父母二女何自而與之相親乎程子曰舜不告而娶固不可堯命瞽使舜娶舜雖不告堯固告之爾堯之告也以君治之而已厥萌在初何所億焉璜臺十成誰所

極焉

億度也論語億則屢中璜美玉也成重也言賢者預見萌芽之端而知其存亡非虛億也紂作象箸

而箕子歎預知象箸必有玉杯玉杯必盛熊蹯豹胎如此必崇廣宮室紂果作玉臺十重糟立酒池以至於亡登立為帝孰道尚之女媧有體孰制匠之

舊說伏羲始畫八卦修行

道德萬民登以為帝誰開導而尊尚之手傳言女媧人頭蛇身一日七十化其體如此誰所制匠而圖之乎上

句無伏羲字不可知下句則怪甚不足論

舜服厥弟終然為害何肆犬豕而

厥身不危敗

服事也言舜弟象施行無道舜猶服而事之然象終欲害舜肆其犬豕之心燒廩寘

井然舜為天子卒不誅
象何耶說見下眩弟章

吳獲迄古南嶽是止孰期去斯

得兩男子

此章未詳舊註以兩男子為泰伯虞仲未知是否

緣鵠飾玉后帝是

饗何承謀夏桀終以滅喪

后帝殷湯也言伊尹始仕因緣烹鵠鳥之羹修玉鼎以事

湯湯賢之遂以為相承用其謀而伐夏桀終以滅桀此即孟子所辨割烹要湯之說蓋戰國游士謬妄之言

帝乃降觀下逢伊摯何條放致罰而黎服大說

帝謂湯也摯伊

尹名也條鳴條也黎衆也言湯觀風俗而逢伊尹遂用其謀伐桀於鳴條而放之南巢天下衆民大喜悅也致

罰即湯詰所謂致天之罰

簡狄在臺

叶徒其反

譽何宜玄鳥致貽女何喜

簡狄中譽妃元鳥燕也貽遺也言簡狄侍帝嘗於臺上有飛燕墮遺其卵喜而吞之因生契事見商頌說見女

岐章該秉季德厥父是臧胡終弊于有扈牧夫牛羊此章未詳

諸說亦異補曰言啓兼秉禹之末德而禹善之授以天下有扈以堯舜與賢禹獨與子故伐啓啓伐臧之有扈遂為牧豎詳此該字恐是啓字字形相似也但牧夫牛羊未有据而其文勢似啓反為扈所弊不可考干

協時舞何以懷之平脅曼膚何以肥之干指也協合也時是也言舜以

干羽合是舞於兩階何以懷有苗而格之也下句未詳舊說平脅曼膚肥澤貌言紂為無道天下乖離當懷憂癯瘦何反肥盛若此乎二事不相似時相去又遠未知然否有扈牧豎云何而逢擊

牀先出其命何從豐重僕之未冠者舊說有扈氏本牧豎之人耳因何逢遇而得為諸侯乎

啓攻有扈之時親於其牀上擊而殺之其命何所從出乎此亦無所據而牧豎之說又與上章相表裏未詳其

說

恒秉季德焉得夫朴牛何往營班祿不但還來

舊說朴大

也言湯常能秉持契之末德出獵而得大牛之瑞其往獵也不但驅馳往來而已還輒以所獲得禽獸徧施祿惠於百姓此篇言秉季德者再而其說不同如此蓋本文已不可考而說者又妄解

昏微遵迹有

狄不寧何繁鳥萃棘負子肆情

舊說人循闇微之道為戎狄之行者不可以安

其身謂晉大夫解居父聘吳過陳之墓門見婦人負其子欲與之淫決婦人則引詩刺之曰墓門有棘有鴝萃止言雖無人棘上猶有鴝鴒獨不愧也今詳其說上一句迂曲難解下事亦無所據補引列女傳陳辯女事又無負子肆情之意皆不足論

眩弟並淫危害厥兄何變化以作詐而

後嗣逢長

眩弟感亂之弟也問何象欲殺舜變化作詐而舜為天子反封象於有庠使其後嗣子孫

長為諸侯乎孟子仁人之於弟不藏怒不宿怨封之有庠富貴之也知此則知其說成湯東巡有

莘爰極何乞彼小臣而吉妃是得

有莘國名極至也小臣謂伊尹也言湯求

巡至於有莘乞句伊尹因得吉善之妃以為內輔也史記阿衡欲干湯而無由乃為有莘氏媵臣謂此也然以孟子觀之則水濱之木得彼小子夫何惡之媵有莘之此說皆妄

婦

舊說小子謂伊尹媵送也言伊尹母妊身夢神女告之曰曰竈生鼃亟去無顧居無幾何曰竈中生鼃母

去東走顧視其邑盡為大水母因溺死化為空桑之木水乾之後有小兒啼水涯人取養之既長大有殊才有莘忌其從木中出因以送女謬妄甚明不必辨湯出重泉夫何罪尤不勝心伐

帝夫誰使挑之

重泉地名在馮翊郡史記所謂夏臺也言桀拘湯於此而復出之湯既得出遂

不勝衆人之心而以伐桀
是誰使桀先拘湯以挑之

會鼂爭盟何踐吾期蒼鳥羣

飛孰使萃之

舊說武王將伐紂使膠鬲視武王師膠鬲問曰欲以何日至殷武王曰以甲子日

膠鬲還報紂會天大雨道難行武王晝夜行或諫曰雨甚軍士苦之請且休息武王曰吾許膠鬲以甲子日至殷令報紂矣吾甲子日不到紂必殺之吾故不敢休息欲救賢者之死也遂以甲子日朝誅紂不失期也下二句不可曉註云蒼鳥鷹也言將帥勇猛如鷹鳥羣飛惟武王能聚之詩云惟師尚父時惟鷹揚是也未知是否

列擊紂躬叔旦不嘉何親揆發定周之命以咨嗟授殷

天下其位安施反成乃亡其罪伊何

叔旦武王弟周公也嘉善也揆度也

猶言帝度其心發武王名史記言武王至紂死所射之三發以黃鉞斬其頭懸之大白之旗此所謂列擊紂躬

也然未見周公不喜與其咎嗟以揆武王使定周命之事蓋當時猶有其傳而今失之也此問周公既不喜列擊紂躬何為又教武王使定周命乎蓋周公但不喜觀斬紂頭之事耳固未嘗不欲定周之命而王天下以傳子孫也後四句不可曉似謂天既授殷以天下而今亡之使其位何所施耶蓋唯反其所以成者是以至於滅亡而其為罪果何事耶但語意大簡未有以見其必然耳

爭遣伐器何以行之並驅

擊翼何以將之

並驅擊翼謂秦誓言羣后以師畢會也並驅擊翼謂六韜曰翼其兩旁疾擊其

後言武王之軍人人樂戰並驅而進之也問此二者何以使其然耶

昭后成遊南土爰底

厥利維何逢彼白雉

昭后成王孫昭王瑕也成猶遂也底至也昭王南遊至楚楚人鑿其

船而沈之遂不還杜預云昭王南巡守涉漢船壞而溺二說不同未知孰是白雉事無所見舊註周公時越裳

氏嘗獻之昭王德不能致而欲
親往達迎之亦恐未必然也

穆王巧梅

芒改反

夫何周

流環理天下夫何索求

方言梅貪也賈生所謂品庶每生是也巧梅言巧於貪求史記

周穆王得驥溫驪驊騮耳之駒西巡守樂而忘歸徐偃王作亂造父為穆王御長驅歸周以救亂環旋也左傳云穆王欲肆其心周行天下將必有車轍馬迹焉祭公謀父作祈招之詩以止王心王是以獲沒於祗宮

妖夫曳銜何號于市周幽誰誅焉得夫褒姒

褒姒周幽王之嬖妾

也昔夏后氏之衰也有二龍止於夏庭而言曰余褒之二君也夏后布幣楫而告之龍亡而聚在櫝而藏之傳三代不敢發至厲王之末發而觀之衆流于庭化為玄龜入王後宮後宮處妾遇之而孕無夫而生女懼而棄之先時有童謠曰壓弧箕服實亡周國後有夫婦相牽引行賣是器於市者以為妖怪孰而戮之哀得亡去聞

所棄女婦聲哀而收之遂奔褒褒人後有罪乃入此女
以贖罪是為褒姒幽王惑而愛之為廢申后及太子宜
白而立以為后遂為
申侯犬戎所殺也
天命反側何罰何佑齊桓九合卒

然身殺

反側言無常也九糾通用卒終也齊桓公任管仲九合諸侯一正天下任豎刁易牙諸子相攻

死不得斂蟲流出戶與見殺無異人之身一
善一惡天命反側罰佑不常皆其所自取也彼王紂之

躬孰使亂惑何惡輔弼讒諂是服

惑紂者內則妲己外則飛廉惡來之徒也

服事也言紂憎輔弼不用忠
直之言而專用讒諂之人

比干何逆而抑沈之雷開

何順而賜封之

此言紂之惡輔弼而用讒諂也比干紂
諸父也諫紂紂怒乃殺之而剖其心雷

開佞人也阿順於紂乃
賜之金玉而封爵之

何聖人之一德卒其異方梅伯

受醢箕子詳狂

方術也梅伯紂諸侯也忠直而數諫紂紂怒乃殺之醢醢其身箕子見之欲去

不忍遂被髮詳狂而為

稷維元子帝何竺之投之於冰

上鳥何煥之

元大也即帝嚳之子棄也帝即嚳也竺義未詳或曰厚也或曰篤也皆未安稷事見

詩大雅及史記后稷名棄其母有邠氏女曰姜嫄為帝嚳元妃出野見巨人迹說而踐之遂身動如孕者居期而生子姜嫄以無父而生棄之於冰上有鳥以翼覆薦溫之以為神乃取而養之詩曰先生如達是首生之子也故曰元子既是元子則帝當愛之何為而竺之即棄之冰上則人惡之鳥何為而煥之邪以此言之則竺字當為天祝予之祝或為天是桮之桮以聲近而訛耳

何馮弓挾矢殊能將之既

驚帝切激何逢長之

馮引弓持滿也其他文多不可曉註以為后稷補以為武王未知孰

是今姑闕之

伯昌號哀秉鞭作牧何令徹彼岐社命有殷國

伯昌謂周文王始為西伯而名昌也號哀號令於殷世
哀殷之際也秉鞭策牧者之事也言服事殷而為之執
鞭以作六州之牧徹通也岐社太王所立岐周之社也
武王既有殷國遂通岐周之社於天下以為大社猶漢
初令民立漢社稷也遷藏就岐何能依殷有惑婦何所譏
言太王
姓徙其實藏來就岐下問何能使其民依倚
而隨之惑婦謂妲己也問有何事可譏乎
受賜茲醢

西伯上告何親就上帝罰殷之命以不救

言西伯文王也
紂醢梅伯

以賜諸侯文王受之以祭告語於上帝帝
乃親致紂之罪罰故殷之命不可復救也
師望在肆昌

何識鼓刀揚聲后何喜

師望太師呂望謂太公也昌文
王也言太公在市肆而屠文王

何以識知之乎后亦謂文王也呂望鼓刀在列肆文王親往問之呂望對曰下屠屠牛上屠屠國文王喜載與俱歸此問何但聞其鼓刀之聲而親往問之乎然此與殲於渭濱而得太公之說不同蓋當時好事者之言猶伊尹負鼎百里自鬻之比惜乎孟子時無問者不得并拈擊之然則其問亦不足答矣

武發殺殷

何所悒載尸集戰何所急

言武王發欲誅殷紂何所悒而不能久忍遂載文王之

柩於軍中以會戰何所急而然也此言當時傳聞之語故為伯夷扣馬之詞亦有父死不葬之云與此皆誤

伯林雉經維其何故何感天抑墜夫誰畏懼

舊註以此為晉太子

申生之事未知是否

皇天集命惟何戒之受禮天下又使至代之

言皇天集祿命以與王者何不常有以戒之而使至於危亡乎王者既受天之禮命而王天下天何為使他姓

代之乎其警戒
之意至深切矣
初湯臣摯後茲承輔何卒官湯尊食宗

緒

言湯初舉伊尹以為凡臣耳後知其賢乃以備疑丞輔翼也官如官卿之適之官言終使湯為天子尊其

先人以王者禮樂祭祀緒業流於子孫也
勳闔夢生少離散亡何壯武厲能

流厥嚴

勳功也闔吳王闔廬也夢闔廬祖父壽夢壽夢卒太子諸樊立諸樊卒傳弟餘祭餘祭卒傳弟

夷末夷末卒當傳弟札札不受夷末之子王僚立闔廬諸樊之長子次不得為王少離散亡故在外乃使專諸刺王僚代為吳王以伍子胥為將破楚
彭鏗斟雉帝何

饗受壽永多夫何長

彭鏗彭祖也舊說鏗好和滋味進雉羹于堯堯饗之而錫以壽考至

八百歲莊子以為上及有虞下及五伯是也但此本謂上帝已為妄說而舊註以為堯又妄之尤也
中央

共牧后何怒螽蟻微命力何固

此章之義未詳當闕

驚女采薇鹿

何祐北至回水萃何喜

此章未詳亦當闕

兄有噬犬弟何欲易

之以百兩卒無祿

舊註以此為秦公子鍼之事然與左傳不同未知是否

薄暮雷

雷歸何憂厥嚴不奉帝何求

此下皆不可曉今闕其義

伏匿穴處爰

何云荆勲作師夫何長

自此至篇終皆隔句叶韻

悟過改更我又何

言吳光爭國又余是勝

吳光即闔閭也

何環穿自閭社丘陵爰

出子文

子文楚令尹聞穀於菟左傳若敖娶於郢生鬬伯比若敖卒從其母畜於郢淫於郢子之女生

穀於菟實為令尹子文夫子稱其忠事見論語他則不可曉矣

吾告堵敖以不長

楚人謂未

成君而死者曰教堵敖者楚文王子成王兄

何試上予忠名彌彰

九辯

晦菴朱氏曰九辯者屈原弟子楚大夫宋玉之所作也閔惜其師忠而放逐故作九辯以

述其志云○愚按文選梁昭明太子已選五篇今補四篇於此

宋玉

霜露慘悽而交下兮心尚拳其弗濟霰雪零糅其增加
兮乃知遭命之將至願微倖而有待兮泊莽莽與墜草

同死

拳一作幸莽莫古反死叶去聲○霜露下而霰雪加喻哀亂之愈甚泊止莽莽草盛也幸望至再而

卒不能免也

願自直而徑往兮路壅絕而不通欲循道而平

驅兮又未知其所從然中路而迷惑兮自厭益涉按而

學誦

叶夕恭反

性愚陋以褊

卑善反

淺兮信未達乎從容竊美

申包胥之氣晟兮恐時世之不固

厭按皆抑止之意言欲速則不達欲緩則

無門故自抑而止也學誦未詳王註以為吟詩禮未知是否褊急也狹也從容宛轉委曲之意申包胥楚大夫也伍子胥得罪於楚將適吳見申胥謂曰我必亡郢中包胥曰子能亡之我能存之子胥奔吳為吳王闔閭臣興兵而伐楚破郢昭王出奔於是申包胥乃之秦請救兵鶴立於秦庭啼呼悲泣七日七夜不絕聲勺飲不入於口秦伯哀之為發兵救楚昭王復國此言已能為包胥事但恐時世不同人不我信耳固當作同何時

俗之工巧兮滅規槩而改鑿

叶音造

獨耿介而不隨兮願

慕先聖之遺教

叶音吉

處濁世而顯榮兮非余心之所樂

叶五告反

與其無義而有名兮寧窮處而守高

叶孤到反

食不媮

他鉤反

而為飽兮衣不苟而為溫竊慕詩人之遺風兮願

託志乎素餐

孫

蹇充倔

巨物反

而無端兮泊莽莽而無垠

無衣裘以御

禦

冬兮恐溘死而不得見乎陽春

媮即偷也言衣

食固非不欲其溫飽但不可以非義而苟媮以得之耳故寧不素餐無衣裘而飢凍以死也詩人言不素餐兮

見伐檀篇素空餐食也謂無功德而空食其祿也充倔記作充趾註謂喜失節貌御止也

靚杪秋之遙夜兮心繚悵而有哀春秋遑遑

竹角反

而日

高兮然惆悵而自悲四時遞來而卒歲兮陰陽不可與

儷偕

哀偕如字悲補皆反哀叶衣偕居支反○靚與靜同杪末也繚繚繞也悵悲結也連遠也遞更易也

儷偶也不可偶而與之偕言彼去而已留

白日晚

宛晚其將入兮明月銷鑠

而滅毀歲忽忽

一作留

而邁盡兮老冉冉而愈

俞弛施心

搖恍而日奔

一作幸

兮然怊悵而無冀

叶上聲

中惜惻之悽

愴兮長太息而增欷

叶上聲○惋晚景眈也入落也銷鑠滅毀謂缺也弛放也搖動也冀

望也心謂既老將有所遇故搖恍而日幸然卒自知其無所望

年洋洋以日往兮老

廓而無處事疊疊而覲進兮蹇淹留而躊躇

寥廓空也

何汜濫之浮雲兮

卑逞反

離

一作壁

蔽此明月忠昭昭而

願見兮然露

陰

晻而莫達

森速疾貌

言浮雲之蔽月以比讒賊之害賢也露雲覆日

也晻陰風也

願皓日之顯行兮雲蒙蒙

一作漆

而蔽之竊不自

料

一作聊

而願忠兮或默

丁感反

點而汙

烏故反

之

料量也默點垢汙沾

辱也

堯舜之抗行兮瞭冥冥而薄天何險巇之嫉妬兮被

以不慈之偽名彼日月之照明兮尚黯

鄔感反

黜

徒感反而

有瑕何況一國之事兮亦多端而膠加

黜黜雲黑黜黜日月使有瑕也

膠加庚也

被荷裊之晏晏兮然潢洋而不可帶既驕美而伐

武兮負左右之耿介憎愠愉之修美兮好夫人之慷慨
衆踳蹀而日進兮美超遠而逾邁農夫輟耕而容與兮
恐田野之蕪穢事縣縣而多私兮竊悼後之危敗世雷

同而炫曜兮何毀譽之昧昧

被音披晏一作吳潢戶廣反洋音養○此亦謂有美

名而無實用驕美自矜其美伐武自誇其武也負恃也
左右侍臣也耿介亦剛勇之意農夫輟耕而容與言不
恤國政而嬉遊也多私徇己意任女謁聽讒言之類雷
同雷聲相似有同無異也人君矜能自用荒怠邪僻臣
下又承其意莫之敢違是以毀譽
不核而聰明靡蔽國事膠加也

今修飾而窺鏡兮後

尚可以竄藏願寄言夫流星兮羌儵忽而難當卒靡敵

此浮雲兮下暗漠而無光

修飾窺鏡謂修德行政而聽人言考往事以自鑑尚可窺

藏言尚可以潛伏而不至於滅亡寄言欲附此言以諫諍其君也流星既不可值則卒為靡蔽而不可解矣

堯舜皆有所舉任兮故高枕而自適諒無怨於天下兮

心焉取此怵惕察

一作六

騏驥之瀏瀏兮馭安用夫強策

諒城郭之不足恃兮雖重介之何益

瀏瀏言如水之流也言所任得人無

怨於下則不假威刑自成美化不然則雖有城郭甲兵不足恃矣

遭翼翼而無終兮怵

徒渾反 惛惛

而愁約生天地之若過兮功不成而無效

遭行不進約窮約也生天地謂人生天地之間也若過言如行所經歷不久留也古詩云人生天地間忽如遠

行客願沈滯而不見兮尚欲布名乎天下然潢洋而不

遇兮直恂

遘愁茂

而自苦

恂愁愚也言欲退而自修以立名於世然亦未有所遇以

著其節空愚昧而自苦耳

莽洋洋而無極兮忽翱翔之焉薄國有驥

而不知乘兮焉皇皇而更索甯戚謳於車下兮桓公聞

而知之無伯樂之善相兮今誰使乎譽之罔流涕以聊

慮兮惟著意而得之紛怵怵之願忠兮妬被離而鄣之

甯戚見前篇著意猶言著乎心言存於心而不釋也桓公惟心常在於求賢故聞甯戚之歌而知其非常人也

怵怵專壹貌

願賜不肖之軀而別離兮放遊志乎雲中乘精

氣之搏搏

度官反

兮驚諸神之湛湛驂白霓之習習兮歷

羣靈之豐豐

既為說妬所障故願乞身而去精氣謂日月搏與園同湛湛厚集貌習習飛動貌豐

豐言多也

左朱雀之茷茷

一作茷又拔皆音茷

兮右蒼龍之躍躍

其居反又

作躍

屬雷師之闐闐

田

兮通飛廉之衙衙

五乎反又音魚○茷茷飛揚貌

躍躍行貌闐闐鼓聲衙衙亦行貌

前輕鯨

涼

察之鏘鏘兮後輜察之從

從

楚紅反

載雲旗之委蛇兮扈屯騎之容容

輕鯨車之輕而有憲者招


魂註軒轅皆輕車名是也鏘鏘從從皆驚聲也輜駟車前衣車後也

計專專之不可化兮

願遂推而為臧賴皇天之厚德兮還及君之無恙

叶音羊○

言我但能專一於君而不可化故今只願推此而為善
明本性固然非擇而為之又言若以皇天之靈使吾君
及此無恙之時而一寤焉則是吾之深願也說又恙憂
也一曰蟲入腹食人心古草居多被此毒故相問無恙
乎



文選補遺卷二十九

欽定四庫全書

集部

文選補遺卷三十一

詳校官中書臣丁榮祚

助教臣常循覆勘

總校官中書臣朱鈐

校對官監丞臣張曾炳

謄錄監生臣史殿榮

欽定四庫全書

文選補遺卷三十

離騷

元 陳仁子 輯

惜誓

晦菴朱氏曰惜誓者漢梁太傅賈誼之所作也誼洛陽人漢文帝聞其名召為博士超遷

至太中大夫納用其言議以任公卿之位絳灌之屬毀誼年少初學擅權紛亂諸事於是天子亦疎之以誼為長沙王太傅三年復召以為梁太傅數問以得失多欲有所匡建數年梁王騎墜馬死誼自傷為傳無狀哭泣歲餘亦死時年三十三矣史漢於誼傳獨載弔屈原鵬鳥二

賦而無此篇故王逸雖謂或云誼作而疑不能
明獨洪興祖以為其間數語與弔屈賦詞指略
同意為誼作亡疑者今玩其詞實亦環異奇偉
計非誼莫能及故特據洪說而并錄傳中二賦
以備一家之言

賈誼

惜余年老而日衰兮歲忽忽而不反登蒼天而高舉兮
歷衆山而日遠

設言高舉經歷衆山去日遠也

觀江河之紆曲兮離四

海之濇濡攀北極而一息兮吸沆瀣以充虛飛朱鳥使

先驅兮駕太一之象輿蒼龍蚺

於糾反

蚺於左驂兮白虎

騁而為右騑

叶步無反

建日月以為蓋兮載玉女於後車馳

驚於杳冥之中兮休息虓

手

崑崙之墟

邱於反。晉志云北極五星天

運無窮三光迭曜而極星不移故曰居其所而衆星共之淮南云左青龍右白虎前朱雀後玄武註云角亢為

青龍參伐為白虎星張為朱鳥斗牛為玄武沈存中云朱雀莫知何物但謂鳥而朱者羽族赤而翔上集必附

木此火之象也或云鳥即鳳也然天文家朱鳥乃取象於鷄南方七宿曰鷄首鷄火鷄尾是也蓋鷄無尾故以

翼為尾云象輿以象齒飾輿也王女青要乘戈等也墟大丘也樂窮極而不厭兮願從

容乎神明

叶謨郎反

涉丹水而馳

一作馳

騁兮右大夏之遺風

叶孚光反黃

一作鴻

鵠之一舉兮知山之紆曲再舉兮睹天地

之園方臨中國之衆人兮託回飆乎尚羊乃至少原之
壑兮亦松王喬皆在旁二子擁瑟而調均兮余因稱乎
清商澹然而自樂兮吸衆氣而翱翔念我長生而久僊

兮不如反余之故鄉

願從容乎神明願與神明俱遊戲也丹水猶赤水也大夏外國名在

西南黃鵠一飛則見山川之屈曲再舉則知天地之圓方居身益高所睹愈遠少原之壑仙人所居均亦調也

國語云律者所以立均出度也清商歌曲名五音各有清濁濁者本聲清者半聲也又言雖得長生久仙猶思

楚國念故鄉忠信之至恩義之篤也黃鵠後時而寄處兮鷗臯羣而制之

神龍失水而陸居兮為螻蟻之所裁夫黃鵠神龍猶如

此兮況賢者之逢亂世哉

鵠鵠怪鳥梟不孝鳥螻蛄也螻蛄也螻蛄也螻蛄也

壽

冉冉而日衰兮固儻

遭

回而不息俗流從而不止兮衆

枉聚而矯直

矯揉也枉者自以為直又羣衆而聚合則其黨盛而反欲揉直以為枉也

或偷

合而苟進兮或隱居而深藏苦稱量之不審兮同權槩

而就衡

叶胡郎反。稱所以知輕重量所以別多少權稱錘也槩平斛木也衡平也權槩皆所以取平

也或推遷移而苟容兮或直言之諤諤傷誠是之不察

兮并級

一作繩

茅絲以為索方世俗之幽昏兮眩白黑之

美惡放山川之龜玉兮相與貴夫礫石梅伯數諫而至

醢兮來革順志而用國悲仁人之盡節兮反為小人之

所賊

諤諤直言貌語曰千人之諾諾不如一士之諤諤武諤諤以昌紂諾諾以亡來惡來也與革皆紂之

佞臣也用國見用於國也

比干忠諫而剖心兮箕子被髮而佯狂水

背流而源竭兮木去根而不長非重軀以慮難兮惜傷

身之無功

叶音光背流而源竭疑當作背源而流竭王逸註水背其源泉則枯竭似當時本未誤也

傷身而無功若比干箕子是已

已矣哉獨不見夫鸞鳳之高翔兮乃集

大皇之塋循四極而周回兮見盛德而後下

大皇之塋大荒之藪

言鸞鳳高飛於大荒之野循於四極回旋而戲見仁聖之王乃下來集歸於有德以言賢者亦宜處山澤之中

周流觀望見高明之君乃當仕也

彼聖人之神德兮遠濁世而自藏使

麒麟可得羈而係兮又何以異庠犬羊

言麒麟仁智之獸遠世避害常

隱藏不見有聖德之君乃肯來出如使可得羈係而畜之則與犬羊無異不足貴也言賢者亦以不可枉屈為高如可趨走亦不足稱也

哀時命

晦菴朱氏曰哀時命者梁孝王客莊忌之所作也

莊忌

哀時命之不及古人兮夫何予生之不遘時往者不可

扳

一作攀

援兮徠者不可與期志憾恨而不逞兮杼中情

而屬詩夜炯炯而不寐兮懷隱憂而歷茲心鬱鬱而無

告兮衆孰可與深謀歛

坎

愁悴而委情兮老冉冉而逮

之

遘遇也言自哀生時不及古賢聖之出而當貪亂之世也逞快也屬續也歛不自滿足意委情懈倦也

居處愁以隱約兮志沈抑而不揚道壅塞而不通兮江

河廣而無梁願至崑崙之懸圃兮采鐘山之玉英擘瑤

木之檣枝兮望閬風之板桐

叶音唐

弱水汨

骨

其為難兮

路中斷而不通勢不能凌波以徑度兮又無羽翼而高翔然隱閬而不達兮獨徙倚而彷徨悵惆罔以永思

兮心紆軫而增傷倚躊躇以淹留兮日饑饉而絕糧廓
抱景而獨倚兮超永思乎故鄉廓落寂而無友兮誰可
與玩此遺芳白日晡晚其將入兮哀余壽之弗將車既
弊而馬罷兮蹇逴徊而不能行身既不容於濁世兮不
知進退之宜當冠崔嵬而切雲兮劒淋離而從橫衣攝
葉以儲與兮左祛挂於搏桑右衽拂於不周兮六合不
足以肆行上同鑿枘於伏戲一作義兮下合矩矱於虞唐
願尊節而式高兮志猶卑夫禹湯雖知困其不改操兮

終不以邪枉而害方世並舉而好朋兮壹斗斛而相

量衆比周以肩迫兮賢者遠而隱藏

鐘山在崑崙山西北淮南言鐘山之

玉燒之三日其色不變擇木名板桐山名在閩風之上將猶長也淋離長貌言己雖不見容猶整飾冠劍與衆

異也攝葉儲與不舒展貌祛袖也左袖挂於搏桑右社拂於不周以六合為小不足肆行也比親也周合也

為鳳皇作鶉籠兮雖翕翅其不容靈皇其不寤知兮焉

陳詞而効忠俗嫉妬而蔽賢兮孰知余之從容願舒志

而抽馮兮庸詎知其吉凶璋珪雜於甌窰兮隴廉與孟

嬭同宮舉世以為恒俗兮固將愁苦而終窮幽獨轉而

不寐兮惟煩懣而盈匈。魂眇眇而馳騁兮心煩。鬼之懣

懣

丑弓反。鷄鳥之小而無尾者。從容言守道而自得也。馮滿也。璋半珪也。珪玉瑞也。甌瓦器所以炊者也。

婦

室甌帶也。隴廉醜也。孟姬好女也。

志飲憾而不憺兮。路幽昧而甚難塊

獨守此曲隅兮。然飲切而永歎。

憺大暫反。憺安也。

愁脩夜而宛

轉兮氣涓

館

灑

與沸同

其若波握剗

居綺反

剗

居衛反

而不用

兮操規槩而無施

叶疎何反。

剗剗刻鏤刀。鏤曲鑿也。應劭曰。剗曲刀。

騁騏驥於

中庭兮。焉能極夫遠道。置猿狖于櫺檻兮。夫何以責其

捷巧

櫺階際闌

馬跛鼈而上山兮。吾固知其不能陞。釋管晏

而任臧獲兮何權衡之能稱

臧為人所賤係也獲為人所得也方言臧獲奴婢

賤稱也

篲昆路

雜於廢

鄒

蒸兮機蓬矢以射革負擔荷

下可以反

以丈尺兮欲伸要而不可得外迫脅於機臂兮上

牽聯於矰

增

雉

弋

肩傾側而不容兮固陋腹而不得息

陋音狹○

篲路竹箭也廢麻黦也蒸竹炬也背曰負肩曰擔丈尺言行於丈尺之下也機臂弩身也陋隘也

務光自投於深淵兮不獲世之塵垢

叶音古

孰魁摧之可

久兮願退身而窮處鑿山楹而為室兮下被衣於水渚

霧露濛濛其晨降兮雲依斐

非

而承宇虹霓紛其朝霞

兮夕淫淫而淋雨怡茫茫而無歸兮悵遠望此曠野下

垂釣於谿谷兮上要求於僊者與赤松而結友兮比王

僑而為耦使臯楊先導兮白虎為之前後叶胡反浮雲霧

而入冥兮騎白鹿而容與務光古清白之士言不見從自投深淵而死不為讒佞所

塵汙魁推未詳依斐雲貌朝霞暮雨明不能久也臯楊山神即狒狒也爾雅狒狒如人被髮迅走食人魂

眈眈征以寄獨兮汨于筆反徂往而不歸處卓卓而日遠

兮志浩蕩而傷懷胡威反鸞鳳翔於蒼雲兮故矰繳而不能

加蛟龍潛於旋淵兮身不挂於罔一作網羅知貪餌而近

死兮不如下遊乎清波寧幽隱以遠禍兮孰侵辱之可

為叶吾未反子胥死而成義兮屈原沈於汨羅雖體解其不

變兮豈忠信之可化叶胡戈反志怫怫叶庚反而內直兮履繩

墨而不頗叶平聲執權衡而無私兮稱輕重而不差叶何言反

以貪餌而得死者固不可憚一作慨塵垢之狂攘兮除穢

累而反真形體白而質素兮中皎潔而淑清時馱飫而

不用兮且隱伏而遠身聊竄端而匿迹兮嘆莫寂默而

無聲獨便曄而煩毒兮焉發憤而舒情時曖曖其能罷

疲兮遂悶歎而無名伯夷死於首陽兮卒天隱而不榮

太公不遇文王兮身至死而不得逞

叶丑京反

懷瑤象而佩

瓊兮願陳列而無正

叶側京反

生天墜之若過兮忽爛漫而

無成邪氣襲余之形體兮疾憊怛

多達反

而萌生願益見

陽春之白日兮恐不終乎永年

叶奴京反

攘亂貌猷猷自足而不

樂見聞之意竄端藏其端緒不使人少見之無正言無人能知己之賢而平其是非

大招

晦菴朱氏曰大招不知何人所作或曰屈原或曰景差自王逸時已不能明矣其謂原作

者則曰詞義高古非原莫及其不謂然者則曰漢志定著原賦二十五篇今自騷經以至漁父

欽定四庫全書

文選補遺
卷三十

八

已充其目矣其謂景差則絕無左驗是以讀書者往往疑之然今以宋玉大小言賦考之則凡差語皆平淡醇古意亦深靖閒退不為詞人墨客浮夸豔逸之態然後乃知此篇決為差作無疑也雖其所言有未免於神怪之惑逸欲之娛者然視小招則已遠矣其於天道之詘伸動靜蓋若粗識其端倪於國體時政又頗知其所先後要為近於儒者窮理經世之學予於是竊有感焉因表而出之以俟後之君子云

景差

青春受謝白日昭只春氣奮發萬物遽只冥淩泱行魂無逃只魂魄歸徠無遠遥只

遽叶渠驕反○青東方春位其色青也謝去也言玄

冬謝去而青春受之白日昭者冬寒則日無光輝故春
氣和暖而後白日昭明也只語已詞遽猶競也冥幽暗
凌冰凍言春氣既發萬物競起幽暗冰凍之地悲周浹
而流行故冤冤之已散而未盡者亦隨時感動而無所
逃於是及此時而招之欲其無遠去而即歸來祭義所
謂春雨露既濡君子履之必有怵惕之心如將見之故
稀_{有樂以迎其來意亦如此}非嘗覃思於有魂乎歸徠
無動靜之間者不能知也讀者宜深玩之

無東無西無南無北只東有大海溺水泔泔攸只螭龍

並流上下悠悠只霧雨淫淫白皓膠只魂乎無東湯谷

宗寥

叶力反

只

膠叶貌皓然正白回錯膠戾也湯谷日之所出

居幽反

悠悠螭龍行貌皓膠冰凍

也

所出

延

延

延

延

延

其地無所見聞也

魂乎無南南有炎火千里蝮蛇延

只山林險隘虎豹蛇只鰓魚恭反鰓以恭反短狐王虺鴛只

魂乎無南蜮或傷躬叶居反只蜮長貌也蛇虎行貌鰓魚名皮有文鰓魚音如鼠鳴

短狐蜮也說文蜮似鼯三足陸機曰一名射影人在岸上影見水中投人影則射之或云含沙射人孫思邈云

亦名射工其蟲無目而利耳能聽聞人聲魂乎無西便以口中毒射人王虺大蛇也鴛舉頭貌

方流沙潏洋洋只豕首縱目被髮鬣而羊反只長爪踞牙

誼嬉笑狂只魂乎無西多害傷只潏水大貌洋洋無涯貌縱直豎也鬣髮亂

貌踞牙言其牙如鋸誼強笑也言魂乎無北北有寒山西方有神其狀如此能傷害人

遑卓龍許力反絕許力反只代水不可涉深不可測只天白顥顥

皓寒凝凝只魂乎無往盈北極只

連龍山名皚赤色無草木貌顥顥光貌凝

凝冰凍貌盈北極言此冰凍滿北極

魂魄歸徠間以靜只自恣荆楚安以

定只逞志究欲心意安只窮身永樂年壽延只魂兮歸

徠樂不可言只

安叶一先反

五穀六仞設菰梁只鼎臠

仁珠反

盈望和致芳只內鵠鵠鵠味豺羹

叶力當反

只魂乎歸徠恣

所嘗只

五穀稻稷麥豆麻也仞伸臂一尋八尺也言積穀之多也設施也菰梁蔣實一名彫葫膳熟也

致致醎酸也芳謂椒薑也內與胸同肥也鵠即鵠鵠也鵠似鳩而小鵠有青黃曰鵠豺似狗

鮮鵠甘

雞和楚醕只醢豚苦狗膾苴蓐只吳酸蒿蕪不沾薄只

魂兮歸徠恣所擇只

生潔為鮮鰻大龜也酪乳漿也醢肉醬也若以膽和醬也世所謂膽

和者苴蓐一名藁荷本草云葉似初生甘蔗根似薑牙蓋切以為香也藁白藁春生秋乃香美可食薑蒿葉似

艾生水中脆美可食沾多汁也薄無味也言吳人炙鵠工調醎酸燐蒿薑以為齋其味不醢不薄適甘美

反古活

烝鳧沾

潛

鵠陂只煎鱮積

雕雀遽與存

叶祖反

只魂

乎歸徠麗以先只

炙燔肉也鵠麋鵠也沾燐也鵠駕也鱮小魚也遽與存未詳

四耐

并孰不盟嗑

益

只清馨凍飲不歡役只吳醴白蘖和楚

瀝只魂乎歸徠不遽惕只

耐三重釀酒秦月令云春釀之孟夏始成漢亦以春釀八

月乃成此云四耐則是四重釀矣并俱也舊註以為四器俱熟未知孰是也盟不滑也嗑咽喉也言不盟人之

咽喉也馨香之遠聞也凍猶寒也歆役未詳舊註謂不以飲賤役之人言酒醇美役人飲之易醉仆失禮故不以飲之也再宿為醴蘖米麴也漑清酒也言使吳人釀醴和白麴以作楚漑也代秦鄭衛鳴竽

張只伏戲駕辯楚勞商只謳和揚阿趙簫倡只魂乎歸

徠定空桑只

代秦鄭衛當世之樂也伏羲之駕辯楚之勞商疑皆古曲名而未有考或謂伏羲始

作瑟也徒歌曰謳揚阿即陽阿已見前篇趙簫趙國之簫也以趙簫奏揚阿為先倡而謳以和之空桑琴瑟名

見周禮二八接武投詩賦只叩鐘調磬娛人亂只四上競

氣極聲變只魂乎歸徠聽歌謨只

接連也武迹也投合也詩賦雅樂闕睢鹿

鳴之類叩擊也金曰鐘石曰磬亂理也四上未詳謨具也

朱脣皓齒嫫

護

以姱

叶苦反

只比

反必寐

德好間

閑

習以都只豐肉微骨調以娛只魂

乎歸徠安以舒只

嫵嫵好貌好間謂美好而間暇習謂習於禮節都謂容態之美不鄙野也

嫵目宜笑娥眉曼只容則秀雅穉朱顏只魂乎歸徠靜

以安只

嫵盼也曼長而輕細也則法也穉幼也

嫵脩滂浩麗以佳

叶居宜反只

曾頰倚耳曲眉規只滂心綽態姣麗施只小腰秀頸若

鮮卑只魂乎歸徠思怨移只

脩長也滂浩廣大也佳善也曾重也倚辟也規圓也

言面豐滿頰肉若重兩耳郭辟曲眉正圓也綽綽約也鮮卑衮帶頭也言腰支細小頸銳秀長若以鮮卑之帶約而來之補曰鮮卑之帶漢匈奴傳所謂黃金犀毗孟康以為要中大帶張晏以為鮮卑郭洛帶瑞獸名東胡

好服之也魏書曰鮮卑東胡別保鮮卑
山因號焉移去也言可以忘去怨思也易中利心以動

作只粉白黛黑施芳澤只長袂拂面善留客只魂乎歸

徠以娛昔只
易中利心皆敏慧之意芳澤芳香之音澤也昔夜也青色直眉美目

媼
綿只靨於牒反輔奇牙宜笑嗎
虛延反只豐肉微骨體便

娟只魂乎歸徠恣所便只
青色謂眉也媼美目貌輔頰車也左傳輔車相依嗎笑貌

便娟好貌便猶安也夏屋廣大沙堂秀只南房小壇觀絕雷只曲

屋步擱宜擾畜只騰駕步遊獵春囿只
壇音善沙也壇猶堂也

觀猶樓也雷屋宇也曲屋周閣也步擱長砌也上林賦
作步擱李善云長廊也擾畜馴養禽獸也步遊亦言行

遊耳非必舍車而徒也

瓊轂錯衡英華假只蒨蘭桂樹鬱彌路只

魂乎歸徠恣志慮只

假大也言所乘之車以玉飾轂以金錯衡英華照耀大有光明也彌

也竟孔雀盈園畜鸞皇只鵠鴻羣晨雜鵠秋鵠只鴻鵠代

遊曼鵠肅鵠霜

只魂乎歸徠鳳皇翔只

鵠鵠雜鴻鵠也晨旦鳴也書

曰北雞無晨鵠鵠類鵠也曼曼行也鵠鵠長頸綠身似鴈

曼澤怡面血氣盛只永宜

厥身保壽命只室家盈庭爵祿盛只魂乎歸徠居室定

只

怡憚貌室家謂宗族盈庭滿朝廷也

接徑千里出若雲只三圭重侯聽

類神只察篤天隱孤寡存只魂兮歸徠正始昆只

接徑猶言

通路也出若雲言人民衆多其出如雲三圭謂公侯伯也公執圭圭侯執信圭伯執躬圭故曰三圭重侯猶曰陪臣謂子男也蓋楚僭王號其縣宰皆號曰公如申公崇公之類其小者應亦比子男也聽類神者言其聽察精審如神明也篤厚也夭早死也隱幽蔽也孤者幼而無父寡者老而無夫也察天隱者而厚之則孤寡皆得其所矣昆後也正

其始以及後人

田邑千畛人阜昌只美冒衆流德澤

章只先威後文善美明只魂乎歸徠賞罰當只

明謨郎反○田

野也邑居也周禮九夫為井四井為邑畛田上道也阜盛也昌熾也冒覆也章明也威武也言先以威武嚴民後以文德撫之既善美而又光明也名聲若日照四海只德譽配天萬民

理只北至幽陵南交趾只西薄羊腸東窮海只魂乎歸

徠尚賢士只

德譽配天又能理萬民之冤結也幽陵幽州

也交趾南夷其人足大指開析兩足並立指則相交羊腸山名山形屈辟狀如羊腸今在太原晉陽之西北言魂急歸徠楚方尚進賢士必見用也

發政獻行禁苛暴只舉傑壓陞誅讎

罷疲只直羸在位近禹麾只豪傑執政流澤施只魂乎

歸徠國家為只

獻行令百官上其行治如周禮令羣吏致事漢法令郡國上計也舉傑厭陞延

登俊傑使在位以壓階陞也誅責而退之也讎罷衆所讎誅疲軟不勝任之人直羸謂理直而有餘者禹麾

未詳國家為言如此則國家可為

雄雄赫赫天德明

叶謨

只三公穆穆

登降堂只諸侯畢極立九卿

叶乞

只昭質既設大侯張

只執弓挾矢揖辭讓

叶如羊反

只魂乎歸徠尚三王只

雄雄赫赫

威勢盛也穆穆和美貌諸侯位次三公其班既絕乃使九卿立其下昭實謂射侯所畫之地如言白質赤質之類大侯謂所射之布如言虎侯豹侯之類也上手延登曰揖壓手退避為讓致語以讓為辭古者大射燕射鄉射之禮將射者皆執弓挾矢以相揖又相辭讓而後升射戰國時此禮已廢久矣故景差特於卒章言此以招屈原之魂欲其徠歸而尚此三王之道以矯衰世之失也不特此耳其他若云察幽隱存孤寡治田邑阜人民禁苛暴流德澤舉賢能退罷劣亦三王之政也

反離騷

晦菴朱氏曰反離騷者漢給事黃門郎新莽諸吏中散大夫揚雄之所作也雄少好

詞賦慕司馬相如之作以為式又怪屈原文過相如至不容作離騷自投江而死悲其文讀之

未嘗不流涕也以爲君子得時則大行不得則
龍蛇遇不遇命也何必湛沈身哉乃作書往往
撫離騷文而反之自崑山投諸江流以弔原云
始雄好學博覽恬於勢利仕漢三世不徙官然
王莽爲安漢公時雄作法言已稱其美比於伊
尹周公及莽篡漢竊帝號雄遂臣之以耆老久
次轉爲大夫又放相如封禪文獻劇秦美新以
媚莽意得校書天祿閣上會劉尋等以作符命
爲莽所誅辭連及雄使者來欲收之雄恐懼從
閣上自投下幾死先是雄作辭嘲有爰清爰靜
遊神之廷惟寂惟寞守德之宅之語至是京師
爲之語曰爰清靜作符命唯寂寞自投閣雄因
病免既復召爲大夫竟死莽朝其出處大致本
末如此豈其所謂龍蛇者邪然則雄固爲屈原
之罪人而此文乃離騷
之讒賊矣他尚何說哉

揚雄

有周氏之蟬媽兮或鼻祖於汾隅靈宗初謀伯僑兮流

于末之揚侯

蟬媽連也媽於連反鼻始也汾隅揚邑也雄自言系出於周而食采於揚也諱譜也

周衰而揚氏有號為揚侯侯叶音胡淑周楚之豐烈兮超既離乎皇波因

江潭而注記兮欽弔楚之湘纍

淑善也去汾隅徙巫山得周楚之美烈也超速

也離歷也皇大也經河及江歷大波也潭深淵也注音往乘水而往也記書也指屈原也纍囚也成相曰比干

見剗箕子累或曰禮喪容累累又史記孔子累累然如喪家之狗趙武靈王見其長子傫然也皆衰悴之意未

知孰惟天軌之不辟兮何純絜而離紛紛纍以其渙

吐典

反
忍乃典

今暗累以其續紛

軌路也辟開也渙忍穢濁也續匹人反續紛交雜也

漢十世之陽朔兮招搖紀于周正正皇天之清則兮度

后土之方貞

十世數高祖呂后至成帝也招搖斗杓星也周正十一月也記以此時投文也正天

度地自言已志也

圖纍承彼洪族兮又覽纍之昌辭帶鈞矩而

佩衡兮履欂櫨以為綦

圖案其系圖也鈞規也矩方也衡平也欂櫨妖星綦履下飾言

賤也素初貯厥麗服兮何文肆而質齎

資奴子侯反娃於佳反

之珍髦

徒計反

今鬻九戎而索賴

貯積也肆放也齎狹也言其文詞放肆而性狷狹也

閭姬也吳娃也皆古美女也髦髮也賴利也言原在楚如質美女之髦而鬻於九戎之中其人被髮無所用也

鳳凰翔於蓬階兮豈駕鵝之能捷騁驊騮以曲躋兮驢

騾連蹇而齊足

叶音捷。蓬階蓬萊之階。駕音加。駕鵝鳥名。捷及也。驊騮駿馬名。若馳於屈曲。

艱阻之處則與蹇驢無異

枳棘之榛榛

臻

兮緩豹擬而不敢下靈脩

既信椒蘭之嗟

妾

佞兮吾累忽焉而不蚤睹

榛梗穢貌。緩豹見九

歌擬疑也。靈脩原以寄意於楚王也。椒蘭見騷經。諱言也。

衿芰茹

古荷字

之綠衣兮被

夫容之朱裳芳酷烈而莫聞兮不如襞

壁

而幽之離房

衿帶也。夫容亦古芙蓉字。通用餘並見騷經。襞疊衣也。離房別房也。

閨中容競淖約兮相

態以麗佳

叶音圭

知衆嫻之嫉妒兮何必颺累之蛾眉

古眉

字言衆士爭能猶衆女之競容也淖約善容止也態猶勝也言以麗佳相勝也言原自舉其眉使衆憎嫉也音

騷經義見懿神龍之淵潛兮竢慶雲而將舉亡春風之被披讀曰披

離兮孰焉知龍之所處懿美也竢待也龍以潛居待雲為美以譏屈原不能隱德自取

也禍愍吾累之衆芬兮颺煜煜之芳苓遭季夏之凝霜兮

慶讀與羌同天賴而喪榮夏自遭霜言不遇時橫江湘以南淮兮云走

奏乎彼蒼吾與梧同馳江潭之汎溢兮將折衷乎重華趣走

也見騷經舒中情之煩或兮恐重華之不累與陵陽侯之素

波兮豈吾累之獨見許陽侯見九章言屈原欲自投江以陵素波舜必不許之洪興祖

曰吾恐重華許原之沈江以死不精瓊靡與秋菊兮將許雄之投閣而生也斯言得之矣

以延夫天年臨汨羅而自隕兮恐日薄於西山

此又譏原欲餐

玉以延年而反懷沙以求死蓋雄知生固我所欲而不知所欲有甚於生者故也

解扶桑之總

轡兮縱令之遂奔馳鸞皇騰而不屬兮豈獨飛廉與雲

師

此言其去之速也餘說見騷經

卷薜芷與若惠兮臨湘淵而投之棍

申椒與菌桂兮赴江湖而漚

一漚反

之此若杜若惠即蕙也此言原之赴水是

并與其芳潔之操而弃棍大東也漚今漚麻也餘見騷經

費椒糝以要神兮又勤索

彼瓊茅違靈氛而不從兮反湛身於江臯累既

此古攀字

夫傳說兮奚不信而遂行徒恐鷦鷯之將鳴兮顧先百

草為不芳

言既慕傳說何不自信其言而遽去徒以鷽鵲之將鳴為憂而不慮反先百草以就死音

義見騷經然傳說乃巫咸之語雄誤以為原詞初纍棄彼處妃兮更思瑤臺之

逸女抨

普更反

雄鵲以作媒兮何百離而曾不壹耦乘雲

蜺之旖旎兮望昆侖以樛流覽四荒而顧懷兮奚必云

女被高丘

去聲

但高丘無女本言高丘無美女既亡鸞車可求以喻列國無賢君可事耳

之幽藹兮馬駕八龍之委蛇臨江瀕而掩涕兮何有九

招與九歌

此言原實無車可乘無馬可駕又方就死夫湘淵何有歌舞之樂譏騷經之言不實也

聖哲之不遭兮固時命之所有以叶音雖增歎以於邑兮

吾恐靈脩之不累改

叶音已。言楚王必不為屈原而改也。孟子曰十里而見王是予所

欲也不遇故去豈予所欲哉聖賢之心如此原雖未及其拳拳於宗國尤見臣子之至情豈忍逆料其君之不可諫而先自己哉此等義理雄皆不足以知之惟有偷生惜死一路則見之明而行之熟耳以此議原是以

鷗鳥而昔仲尼之去魯兮嗟嗟遲遲而周邁終回復於

舊都兮何必湘淵與濤瀨

斐芳非反。往來貌。孔子乃異姓之臣其去魯也但政亂

耳未有危亡之釁也可去而去可歸溷漁父之鋪歎兮

絮沐浴之振衣棄由賄之所珍兮蹠彭咸之所遺

由許由賄

老聃蹠躡也。許由事不經見。雄亦本不之信。今乃言之。已為抵牾。又不察其生當堯舜之間。身無讒賊之禍。與原事亦不相似也。老聃之學私於為我。而無君臣之義。亦雄所不知至此。乃以為言亦其貪生惜死之心。勝是以溺焉。而不自知耳。○丹陽洪興祖曰。揚雄所以議屈原者如此。而班固亦議其露才揚己。顏之推又病其顯暴君過。愚嘗折衷而論之曰。或問古人有言。殺其身有益於君。則為之。屈原雖死。何益於懷襄。曰。忠臣之用。心自盡。其愛君之誠耳。死生毀譽。所不顧也。故比干以諫見戮。屈原以放自沈。比干紂諸父也。屈原楚同姓也。為人騷曰。貼余身而危死。兮。覽余初其猶未悔。則原之自處。審矣。或又曰。甯武子邦無道。則愚而仲山甫明哲。以保其身。今原乃用智於無道之邦。以虧明哲保身之義。亦何足為賢乎。曰。愚如武子。全身遠害可也。有官守言責。斯用智矣。山甫明哲固保身之道。然不曰夙夜匪解。以

事一人乎士見危致命況同姓兼恩與義而可以不死乎且比干之死微子之去皆是也屈原其不可去乎有比干以任責微子去之可也楚無人焉原去則國從而亡故雖身被放逐猶徘徊而不忍去生不得力爭而強諫死猶冀其感發以政行使百世之下聞其風者雖流放廢斥猶知愛其君眷眷而不忘臣子之義盡矣非死為難處死為難屈原雖死猶不死也後之讀其文知其如賈生者亦鮮矣然為賦以弔之不過哀其不遇而已余觀自古忠臣義士慨然發憤不顧其死特立獨行自信而不可回者其英烈之氣豈與身俱忘哉仍羽人於丹丘留不死之舊鄉超無為以至清與太初而為鄰此遠遊之所作而難為淺見寡聞者道也仲尼曰樂天知命故不憂又曰樂天知命有憂之大者屈原之憂憂國也其樂樂天也離騷二十五篇多憂世之語獨遠遊曰道可受兮不可傳其小無內兮其大無垠無滑而魂兮彼將自來壹氣孔神兮於中夜存虛以待之兮無為之

先此老莊孟子所以大過人者而原獨知之司馬相如作大人賦宏放高妙讀者有凌雲之意然其語多出於此至其妙處相如莫能識也太史公作傳以為其文約其詞微其志繁其行廉其稱文小而其指極大舉類通疎濯淖污泥之中以浮游塵埃之外推此志也雖與日月爭光可也斯可謂深知已者揚子雲作反離騷以爲君子得時則大行不得時則龍蛇遇不遇命也何必沈身哉屈子之事蓋聖賢之變者使遇孔子當與三仁同稱雄未足以與此班孟堅顏之推所云無異妾婦兒童之見余故具論之○晦菴朱氏曰嗚呼余觀洪氏之論其所以發屈原之心者至矣然屈原之心其爲忠清潔白固無待於辯而自顯若其爲行之不能無過則亦非區區辨說所能全也故君子之於人也取其大節之純全而略其細行之不能無弊則雖三人同行猶必有可師者况如屈子乃千載而一人哉孔子曰人之過也各有

於其黨觀過斯知仁矣此觀人之法也夫屈原之忠忠而過者也屈原之過過於忠者也故論原者論其大節則其他可以一切置之而不問論其細行而必其合乎聖賢之桀度則吾固已言其不能皆合於中庸矣尚何說哉且凡洪氏所以為辯者三其一以為忠臣之行發其心之所不得已者而不暇顧世俗之毀譽則幾矣其一引仲山甫甯武子事而不論其所遭之時所處之位有不同者則疎矣其一欲以原比於三仁則夫父師少師者皆以諫而見殺見囚耳非故捐生以赴死如原之所為也蓋原之所為雖過而其忠終非世間偷生幸死者所可及洪之所言雖有未至而其正終非雄固之推之徒所可比余是以取而附之反騷之篇

文選補遺卷三十

欽定四庫全書

文選補遺卷三十一

元 陳仁子 輯

賦

愚按班固曰不歌而誦謂之賦登高能賦可以為大夫古者諸侯卿大夫交接鄰國以微言相感揖

遜之時必稱詩以喻其志蓋以別賢不肖而觀盛衰焉春秋之時周衰道微聘問詠歌不行於列國

學詩之士逸在布衣而賢人失志之賦作矣大儒荀卿及楚臣屈原離騷憂國皆作賦以風咸有惻

隱古詩之義其後宋玉唐勒鄭興枚乘司馬相如下及揚子雲競為侈麗閑衍之詞設其風諭之義

故曰賦雖然屈宋之賦家有人誦獨荀卿之賦人希誦者其體雖不如卿雲之瞻麗而楚賦之盛已

萌蘖於此今附註於首以備觀覽○荀卿禮賦爰
有大物非絲非帛文理成章非日非月為天下明
生者以壽死者以葬城郭以固三軍以強粹而王
駁而伯無一焉而亡臣愚不識敢請之王王曰此
夫文而不采者與簡然易知而致有理者與君子
所敬而小人所不與性不得則若禽獸性得之
則甚雅似者與與匹夫隆之則為聖人諸侯隆之
一四海者與與致明而約甚順而體請歸之禮○知
賦皇天隆物以示下民或厚或薄帝不齊均桀紂
以亂湯武以賢濬濬淑淑皇皇穆穆周流四海曹
不崇日君子以脩跖以穿室大參乎天精微而無
形行義以正事業以成可以禁暴足窮百姓待之
而後寧泰臣愚不識願問其名曰此夫安寬平而
危險隘者邪脩潔之為親而雜汙之為狄者邪甚
深藏而外勝敵者邪法禹舜而不能拚迹者邪行
為動靜待之而後適者邪血氣之精也志意之榮

也百姓待之而後寧也天下待之而後平也明達純粹而無疵也夫是之謂君子之知○雲賦有物於此居則周靜致下動則慕高以鉅圓者中規方者中矩大參天地德厚堯禹精微乎毫毛而盈大乎宇宙忽兮其極之遠也攝兮其相逐而反也卬兮今天下之咸蹇也德厚而不損五采備而成文往來惛憊通乎大神出入甚極莫知其門天下失之則滅得之則存弟子不敏此之願陳君子設詞請測意之曰此夫大而不塞者與充盈大宇而不窺入却穴而不偪者與行遠疾速而不可託託者與往來惛憊而不可為固塞者與暴至殺傷而不億忌者與功被天下而不私置者與託地而游宇友風而子雨冬日作寒夏日作暑廣大精神請歸之雲○蠶賦有物於此儼儼兮其狀屢化如神功被天下為萬世文禮樂以成貴賤以分養老長幼待之為而後存名號不美與暴為鄰功立而身廢

事成而家敗棄其耆老收其後世人屬所利飛鳥
所害臣愚而不識請占之五帝五帝占之曰此夫
身女好而頭馬首者與屢化而不壽者與善壯而
拙老者與有父母而無牝牡者與冬伏而夏游食
桑而吐絲前亂而後治夏生而惡暑喜溫而惡雨
蛹以為母蛾以為父三俯三起事乃大已夫是之
謂蠶理○箴賦有物於此生於山阜處於室堂無
知無巧善治衣裳不盜不竊穿窬而行日夜合雜
以成文章以能合從又善連衡下覆百姓上飾帝
王功業甚博不見賢良時用則存不用則亡臣愚
不識敢請之王王曰此夫始生鉅其成功小者邪
長其尾而銳其剽者邪頭銛達而剽趙繇者邪一
往一來結尾以為事無羽無翼反覆甚極尾生而
事起尾遭而事已簪以為父管以為母既以縫表
又以連裏夫是之謂箴理○俛詩天下不治請陳
俛詩天地易位四時易鄉列星殞墜旦暮晦盲幽

聞登昭日月下藏公正無私反見從橫志愛公利
重樓疏堂無私罪人愆革戴兵道德純備讒口將
將仁人絀約教暴擅強天下幽險恐失世英螭龍
為蜉蝣鳥為鳳凰比干見剗孔子拘匡昭昭乎
其知之明也郁乎其遇時之不祥也拂乎其欲
禮義之大行也闇乎天下之晦盲也皓天不復憂
無疆也千歲必反古之常也弟子勉學大不忘也
聖人共手時幾將矣與愚以疑願聞反辭其小歌
也念彼遠方何其塞矣仁人絀約暴人衍矣忠臣
危殆讒人服矣旋玉瑤珠弗知佩也雜布與錦弗
知異也閭娵子奢莫之媒也嬖母刁父是之喜也
以盲為明以聾為聰以危為安以吉為凶嗚呼上
天曷維其同○愚按荀卿避難之楚春
申君以為蘭陵令在屈原先今附於此

徵詠賦

愚曰文選訪文中於詩賦擬取瞻麗最
備今姑拾其一二遺者于後以備奇觀

宋玉

蔓馳年之騷思黠

他敢切又徒濫切又軟陷切

徂夜之悄

於錄切

憂

念恍

胡廣切

惘以淪忽心震愴

淡

而勞流坐生悲其何念

預

徒空詠以自惘于詠之為情也悵望兮若分江晶素

厓翔傷兮濫行雲再清離浩宕弘以廣度紛收息而淹

儀既御聲以跼

渠足反

制又繫韻而發羈青塗鬱兮春采

香秋色陰兮白露商謹鳥翔

虛緣切

兮山光開

廣雅曰翔飛也唐張

銑曰翔輕飛也東漢張平子思立賦曰翔鳥舉而魚躍兮將往走乎八荒

長霞流布兮林氣

哀于時也深哀美緒孤響端音

傳曰上如抗下如墜累繫乎端如貫珠此言八

音也故孤響端音用對深哀美緒

屬素排滿吐致施英嘈肆懷以鴻暢

慘輟意而相迎馮

憑

幽圖以藉怨咀高華而寄聲體間

慆

他刀切喜也

而都靡心遊任而姝明濯陵奇而素志舒容

綺以昭情占風立候睨天發暉精慮方蕩中置忘歸慨

矣挫歎默焉析機鐘石堦

塵

琬琴瑟林帷

莊子漁父篇孔子遊乎緇

惟之林弦歌鼓瑟

重瀏留愴以徐吟

西漢司馬相如上林賦曰瀏蒞卉欵楚辭曰秋風瀏

瀏以蕭蕭晉潘岳寡婦賦曰雪飛而驟落兮風瀏瀏而夙興西晉司馬彪曰瀏衆聲貌唐張覲曰風吹衆木聲曰

劉

若變宮而下徵首廉麗以輕榮終溫愛而調理歷貞
璇以弘觀留雅恨其誰止爾乃承芳遺則度律聞韶回
白雲以金讚戾秋月而玉寥臨洪流以浩汗履薄冰而
心憔悴君子之嚴秀鏡淑人之靈昭日月會兮爭騫朝
夕見兮玄塗楹華兮開表窈壇兮橫蕪龍義驛兮終不
昭松延蔭兮意沈虛歡陽臺兮迅飛路閼陰櫛兮空長
居去矣回復參咤榮身四脩匪聊亂而剽越空含喁口淮
而動神亂曰簡情撰至振玄和兮神宮妙意賞山

波兮負兮積軒非徒歌兮致命遂志寶中阿兮

笛賦

宋玉

余嘗觀於衡山之陽見竒篠異幹卑節間枝之叢生也

其處磅礴

匹庚切
石聲也 礪

音唐厚
石也

千仞絕谿凌阜隆

一作榮

崛萬

丈盤石雙起丹水涌其左醴泉流其右其陰則積雪凝

霜霧露生焉其東則朱天皓日素朝明焉其南則盛夏

清微春陽榮焉其西則涼風遊旋吸逮

力谷切
行也衆也

存焉

幹枝洞長

掌

桀出有良工焉名高師曠將為陽春北鄙

白雪之曲假塗南國至此山望其叢生見其異形曰命

陪乘取其雄焉得其雌焉將送荆卿於易水上乃使王

爾公輸之徒

張

平子西京賦曰命般爾之巧匠盡變態乎其中唐呂延濟曰王爾古巧人也唐薛

綜曰王爾古之巧者也淮南子曰王爾無所措其剗

西漢枚乘七發曰使般爾斫斬以為琴

班魯班也爾王

爾也皆古之巧人也合妙意角較手遂以為笛於是天旋少陰白

日西靡命巖香使午子延長頸奮玉手搗朱脣曜皓齒

頰顏臻玉貌起吟清商追流徵歌伐檀號孤子

西漢枚乘七發

曰野蘭之絲以為絃孤子之鈎以為隱九寡之珥以為
鈎註曰鈎珥皆寶也隱鈎皆琴上飾也取孤子寡婦之
寶而用之欲發圓轉舒積鬱其為幽也甚乎懷永抱絕
其聲多悲聲

喪夫天亡稚子纖悲微痛毒離腠理激叫入青雲慷慨

切窮士

晉向子期思舊賦曰聽鳴笛之慷慨兮妙聲絕而復陳

列弦節武毅發沈

憂結呵膺揚叱太一聲淫淫以黯黯

他敢切

氣旁合而爭

出歌壯士之必往悲猛勇乎飄疾麥秀漸兮

尚書微子將朝周過

殷之墟見麥秀之蘄蘄曰此父母之國志動心悲也晉書向子期思舊賦曰歎黍離之愍周兮悲麥秀於殷墟

李翰曰箕子從周過殷故鳥聲譁兮招伯奇於源陰追
宗廟作詩曰麥秀漸漸兮

申子于晉域夫奇曲雅樂所以禁淫也錦繡黼黻所以
禦寒也縟則泰過是以檀卿刺鄭聲周人傷北里也亂
曰芳林皓幹有奇寶兮博人通明樂斯道兮般衍瀾
漫終不老兮雙林間麗貌甚好兮八音和調成稟受兮
善善不衰為世保兮絕鄭之遺離南楚兮美風洋洋而
暢茂兮嘉樂悠長俟賢士兮鹿鳴萋萋思我友兮安心
隱志可長久兮

大言賦

宋玉

楚襄王與唐勒景差宋玉遊於陽雲之臺王曰能為寡

人大言者上坐玉因唏

許几切又許既切笑也

曰操是太阿戮剝

一世流血冲天車不可以厲至唐勒曰壯士憤兮絕天

維北斗戾兮

戾字見左氏襄王十九年其必使子產息之乃猶可以戾杜預曰戾定也

太山

夷至景差曰校士猛毅臯陶嘻大笑至今摧覆思鋸牙

裾雲睇甚大吐舌萬里唾一世至宋玉曰方地為車圓

天為蓋長劒耿介倚乎天外王曰未可也玉曰并吞四

夷渴飲枯海跂越九州無所容止身大四塞愁不可長
據地蹴天迫不得仰若此之大也如何楚王曰善

小言賦

宋玉

楚襄王既登陽雲之臺令諸大夫景差唐勒宋玉等並
造大言賦賦畢而宋玉受賞王曰此賦之迂誕則極巨
偉矣抑未備也且一陰一陽道之所貴小往大來剝復
之類也是故卑高相配而天地定位三光並照則小大

備能高而不能下非兼通也能麤而不能細非妙工也

然上坐者未足明賞賢又有能為小言賦者賜之雲夢

之田景差曰載氛埃兮乘澌

匹眇切

塵體輕蚊翼形微蚤

鱗聿遑踴凌虛縱身經由鍼孔出入羅巾飄眇翩綿

乍見乍泯唐勒曰析飛塵以為輿剖粃糠以為舟泛然

投乎杯水淡若巨海之洪流憑蜎皆以顧眄

玉篇曰皆目際也憑

蜎皆以顧眄謂憑蜎蜎目際以為顧眄爾此皆小言也

傳曰爭微利於蜎皆蚊蜎蜎皆即此賦所謂憑蜎皆以顧眄是也蚊蜎西晉張茂先鶴鵠賦所謂巨細舛錯種繁類殊鵠蜎巢於蚊睫大鵬彌乎天隅是也蜎者蜎種

也漢張衡南都賦追水豹兮鞭蝸蝓憚夢龍兮怖蛟螭
國語木石之怪夢蝸蝓家語孔子對獷羊亦曰夢蝸蝓
傳記夢一足蝸蝓目至小憑皆者言憑附蟻亡結蠓亡
至小之目而又於目之背以顧眇耳反孔

反而遐遊集寧隱微之原渾存亡而不憂又曰館于蠅

鬚宴于毫端烹蝨腦切蟻肝會九族而同儕在細切猶委

餘而不殫宋玉曰無內之中微物潛生比之無象言之

無名蒙蒙滅景昧昧遺形超於太虛之域出於未兆之

庭纖於毳末之微蔑陋於茸毛之方生視之則眇眇望

之則冥冥離朱為之歎悶神明不能察其形二子之言

磊磊皆不如此之為精王曰善遂賜雲夢之田

諷賦

宋玉

楚襄王時宋玉休歸唐勒讒之於王曰玉為人身體容
冶口多微辭出愛主人之女入事大王願王疏之玉休
還王謂玉曰玉為人身體容冶口多微辭出愛主人之
女入事寡人不亦薄乎玉曰臣身體容冶受之二親口
多微辭聞之聖人出愛主人之女臣無有也臣嘗出行

僕飢馬疲正值主人門開主人翁出嫗又到市獨有主
人女在女欲置臣堂上太高堂下太卑乃更於蘭房芝
室止臣其中中有鳴琴焉臣援而鼓之為幽蘭白雪之
曲主人之女翳承日之衣披翠雲之裘更白縠單衫垂
明珠步搖步搖婦人首飾晉書南史並載金步搖來排臣戶曰上客無乃
饑乎為臣炊彫胡之飯烹露葵之羹來勸臣食以翡翠
之釵挂臣冠纓臣不忍仰視為臣歌曰歲將暮兮日
已寒中心亂兮勿多言臣復援琴而鼓之為秋竹積雪

之曲主人之女又為臣歌曰內怵惕兮徂玉牀橫自

陳兮

佛經當橫陳時

君之旁君不御兮妾誰怨死日將至今下

黃泉玉曰吾寧殺人之父孤人之子誠不忍愛主人之
女王曰止止寡人於此之時亦何能已

釣賦

宋玉

宋玉與登徒子偕受釣於玄洲上而並見於楚襄王登
徒子曰夫玄洲天下之善釣者也願王觀焉王曰其善

奈何登徒子對曰夫玄洲釣也以三尋之竿八絲之線
餌若蛆蟪鈎如細鍼以出三尺之魚於數仞之水中豈
可謂無術乎夫玄洲芳水餌桂激鈎其意不可得退而
牽行下觸青泥上則波颺玄洲因水勢而施技頡之頡
之委縱收歛與魚沈浮及其解弛也因而獲之襄王曰
善宋玉進曰今察玄洲之釣未可謂能持竿也又烏足
為大王言乎王曰子之所謂善釣者何玉曰臣所謂善
釣者其竿非竹其綸非絲其鈎非鍼其餌非蟪也王曰

願遂聞之宋玉對曰昔堯舜禹湯之釣也以賢聖為竿
道德為綸仁義為鈎祿利為餌四海為池萬民為魚釣
道微矣非聖人其孰能察之王曰迂哉說乎其釣未可
見也玉曰其釣易見王不察爾昔殷湯以七十里周文
以百里興利除害天下歸之其餌可謂芳矣南面而掌
天下歷載數百到今不廢其綸可謂多矣羣生震子禁切
其澤民氓畏其罰其鈎可謂均矣功成而不隳名立而
不改其竿可謂彊矣若夫竿折綸絕餌墜鈎決波涌魚

失是則夏桀殷紂不通夫釣術也今察玄洲之釣也左

挾魚鬻

柳

右執槁竿立于潢汙之涯

宜

倚乎楊柳之間

精不離乎魚喙思不出乎鮒鰕形容枯槁神色憔悴樂不復勤獲不當費斯乃水濱之役夫也已君王又何稱焉王若建堯舜之洪竿攄禹湯之脩綸投之於瀆視之於海漫漫羣生孰非吾有其為大王之釣亦不樂乎

梁王菟園賦

愚曰漢藝文志載宋玉而下二十家三百六十一篇陸賈而下二十一家

計二百七十四篇荀卿而下二十五家計一百三十六篇雜賦十二家計二百三十三篇若此

繁多今雜見文選不十之一二今有見者姑錄于此

枚乘

脩竹檀欒夾池水旋菟園

楚人謂虎於菟菟平聲又亦作兔

並馳道臨

廣衍

西漢司馬相如遊獵賦將茅青蘋布獲閭澤延蔓太原靡麗廣衍東漢張衡西京賦爾乃廣衍沃野

唐張銑曰地下平曰衍

故行於崑崙之壑

苦狠切玉篇耕也治也國語士不備壑壑發也

切韻曰壑耕用力也

莎兮有似乎西山西山隍隍

五哀切

激揚塵埃

蛇龍奏

湊

林木薄遊風踊焉虛谷應焉紛紛絃絃騰踊

亂雲枝葉暈散柯條糾紛谿谷沙石洄波沸日車駸駸

兮連連麟麟音發緒兮非非閭閭擾獸鷗雞

西漢司馬相如賦

玄鶴亂鷗鷗難枚乘七發鷗雞哀翔於其下西晉

張華鷗鷗賦鷗雞竄於幽險孔翠生乎遐裔

蛭切○

蟬也

蛙倉庚密切別鳥相繼哀鳴

家語顏回曰聞宛山之鳥生四子

焉羽翼既成將分于四海其母悲鳴而送之哀聲有似乎此

若乃附巢比翼之傳於

列樹也攏攏

力的切玉篇云指劃也上林賦攏立叢倚連卷攏危唐劉良曰攏謂木之重疊累積

盤結傾歌貌司馬彪曰攏危枝重累也

若飛雪之重弗麗也西望西山

鵲野鳩白鷺霜鷗鷗鷗鷗守狗

汲冢書又山戴勝翡翠守狗九十

翠鳴鵲枝巢穴藏被唐臨谷聲音相聞啄尾離屬翱翔

羣熙交頸接翼關

徒合切

而未至徐飛跬跬

此二字玉篇等書並不收

姑存

往來霞水散漫沒合疾疾紛紛若塵埃之間白雲

窮之乎莫殫究之乎無端於是晚春早夏邯鄲襄國易
涿之麗人及燕汾之游子相與雜還而往款焉車接軫
而馳逐輪錯轂而接服騰躍之意未發嬉遊之歡方洽
心相扶奪氣怒不竭羽蓋繇起被以紅抹濛濛然若雨
委雪高冠翩焉左挾彈右執鞭日移樂衰遊觀西園復
其所次顧錫從者從容安步鬪雞走馬俛仰釣射烹熬

炮炙極歡到暮樂而不捨逮及春郊採桑之婦袿袿錯

紆

袿古攜切袿先的切思立賦曰袿袿錯紆同義張銑曰袿都賦曰被服袿錯與此賦袿袿錯紆同義

歲婦人服也玉篇廣韻曰袿婦人之上服也袿也袿袒也脫衣見體也連袖方路芳溫往

來便娟眄顧已而歌曰春陽生兮萋萋不才子兮心

哀見佳容兮不能歸桑萎蠶饑悵望奈何

早雲賦

愚按藝文志賈誼賦七篇今止有此

賈誼

惟昊天之大旱兮失精和之正理遥望白雲之蓬勃兮

湔湔

於孔切川谷吐氣貌

澹澹而妄止

澹連濫切水動貌

運清濁之瀕

胡動

切水銀謂之瀕

洞兮正重沓而並起

音摧高大貌東漢張衡南

都賦龍崇推嵬

魏兮時彷彿而有似屈卷輪而中天兮象虎驚

與龍駭相搏據而俱興兮妄儷倚而時有遂積聚而給

沓兮相紛薄而慷慨若飛翔之從橫兮揚波怒而澎

蒲衡

切水名澎濞洄也

音秘水暴至聲也

正雲布而雷動兮相擊衝而破

碎或窈窕而四塞兮誠若雨而不墜陰陽分而不相得

兮

國語陰陽分布日夜同也淮南子晝分陽夜分陰今早陰陽分而不相得

更惟貪婪而狼

戾終風解而霧散兮遂陵遲而堵潰或深潛而閉藏兮
爭離刺而並逝廓蕩蕩其若條兮日昭昭而蕪穢隆益
暑而無聊兮煎砂石而爛熳

于貴切
光貌

陽風吸習煬煬羣

生悶懣而愁憤壠畝枯槁而允布壞石相聚而為害農
夫垂拱而無事兮釋其耰鉏而下涕悲疆畔之遭禍痛
皇天之靡濟惟稚稼之早夭兮離天災而不遂懷怨心
而不能已兮竊託咎於在位獨不聞唐虞之積烈兮與
三代之風氣時俗殊而不還兮恐功久而壞敗何操行

之不得兮政治失中而違節陰氣辟而留滯兮猷暴戾
而沈沒嗟乎作孽大劇何辜于天恩澤弗宣嗇夫寡德
羣生不福來何暴也去何躁也孽孽望之其可悼也僚
寮兮慄兮以鬱怫兮念思白雲腸如結兮終怨不雨甚
不仁兮布而不下甚不信兮白雲何懟奈何人兮

諫格虎賦

孔臧

帝使亡諸大夫

言本無此大夫假有之以為辭
猶馮虛公子安處先生之類

問乎下

國下國之君方帥將士於中原車騎駢闐被行罔轡手

格猛虎生縛羆狽

音岸狽羆虎之大者其文如狸

昧爽而出見星而還

國政不恤惟此為歡乃夸于大夫曰下國鄙固不知帝

者之事敢問天子之格虎豈有異術哉大夫未之應因

又言曰下國褊陋莫以娛心故乃闢四封以為藪園境

內以為林禽鳥育之驛驛淫淫

充伋貌

晝則鳴囀夜則嗥

吟飛禽起而翳日走獸動而雷音犯之者其罪死驚之

者其刑深虞候苑令

虞人之候林苑之令

是掌厥禁於是分幕將

士營遮榛叢戴星入野列火求蹤見虎自來乃往尋從
張置網羅刃鋒驅檻車聽鼓鐘猛虎顛遽奔走西東怖
駭內懷迷冒怔忪耳目喪精值網而衝局然自縛或隻

或雙車徒扑讚咸稱曰工乃縛以絲組斬其牙支輪登

較

支與桴同或作枝言獲獸
多可桴其輶輪登滿較式

高載歸家孟賁被髮瞋目

躁猾紛華故都邑百姓莫不于邁陳列路隅咸稱萬歲
斯亦畋獵之至樂也大夫曰順君之心樂矣然則樂之
至也者與百姓同之謂夫兕虎之生與天地偕山林澤

藪又其宅也被有德之君則不為害今君荒於遊獵莫恤國政驅民入山林格虎於其廷妨害農業殘天民命國政其必亂民命其必散國亂民散君誰與處以此為至樂所未聞也於是下國之君乃頓首曰臣實不敏習之日久矣幸今承誨請遂改之

楊柳賦

孔臧

嗟茲楊柳先生後傷蔚茂炎夏多陰可涼伐之原野樹

之中塘溉浸以時日引月長巨本洪枝條脩遠揚天繞
連枝猗那其房或拳局以逮下或擢迹而接穹蒼綠華
累疊鬱茂翳沈蒙籠交錯應風悲吟鳴鵲集聚百變其
音爾乃觀其四布運其所臨南垂大陽北被宏陰西奄
梓園東覆果林規方冒乎半頃清室莫與比深於是朋
友同好几筵列行論道飲燕流川浮觴殽核紛雜賦詩
斷章合陳厥志考以先王賞恭罰慢事有紀綱洗觶酌
樽兕光並揚

兕光一作賞爵

飲不至醉樂不及荒威儀抑抑動

合典常退坐分別其樂難忘惟萬物之自然固神妙之
不如意此楊樹依我以生未寧一紀我賴以寧暑不御
簞淒而涼清內蔭我宇外及有生物有可貴云何不銘
乃作斯賦以叙斯情

鵲賦

孔臧

季夏庚子思道靜居爰有飛鵲集我屋隅異物之來吉
凶之符觀之歡然覽考經書在德為常棄常為妖尋氣

而應天道不踰昔在賈生有志之士忌茲鵬鳥卒用喪
已咨我令考信道秉真變恠生家謂之天神脩德滅邪
化及其鄰禍福無門唯人所求聽天任命慎厥所脩栖
遲養志老氏之儔爵祿之求祇增我憂時去不索時來
不逆庶幾中庸仁義之宅何思何慮自今勤劇

蓼蟲賦

孔臧

季夏既望暑往涼還逍遙諷誦遂歷東園周旋覽觀憩

於南藩覩茲茂蓼結葩吐榮猗那隨風綠葉紫莖爰有
蠕蟲厥狀似螟羣聚其間食之以生於是悟物託事推
向乎人幼長斯蓼莫或知辛膏粱之子豈曰不云惟非
德非義不以為家安逸無心如禽獸何逸必致驕驕必
致亡匪唯辛苦乃丁大殃

哀二世賦

晦菴朱氏曰哀二世賦者司馬相如之所作也相如常從上至長楊獵還過宜春

春宮宜春者本秦離宮閭樂殺胡亥之地也相如奏賦以哀二世行失其詞如此蓋相如之文能侈而不能約能諂而不能諒其上林子虛之作既以誇麗而不得入於楚詞大人之於遠遊

其漁獵又泰甚然亦終歸於諛也特此二篇為
有諷諫之意而此篇所為作者正當時之商監
尤當傾意極言以寤主聽顧乃低徊局促而不
敢盡其詞焉亦足以知其阿意取容之可賤也
不然豈其將死而
猶以封禪為言哉

司馬相如

登陂陲之長阪兮坐入曾宮之嵯峨臨曲江之隍州兮
望南山之參差巖巖深山之硤硤兮通谷豁乎豁豁

何反陲徒何反坐音頓反並也曾重也隍巨依反曲岸
頭也與碕同硤音龍深通貌豁呼活反豁呼舍反大
開貌豁呼加汨域域輟以永逝兮註平臯之廣衍觀衆
反叶音何

樹之蓊夢兮覽竹林之榛榛

滅疾貌。叛先合反。輕舉意。阜水邊地也。蓊烏北反。夢音。

愛陰蔽貌。榛側巾反。盛貌。叶韻未詳。恐有棧音。

東馳土山兮北揭石瀨。弭節容

與兮歷弔二世持身不謹兮亡國失勢

揭邱例反。褰衣而涉也。石而淺。

水曰瀨。

信讒不寤兮宗廟滅絕。嗚呼操行之不得。墓蕪穢

而不修兮魂亡歸而不食

美人賦

司馬相如

司馬相如美麗閒都遊於梁梁王悅之鄒陽譖之於王

曰相如美則美矣然服色容冶姣

方言曰自關而東河濟之間凡好謂之姣

東漢張衡南都賦男女姣服韻釋

切麗不忠將欲媚辭

取悅遊王後宮王不察之乎王問相如曰子好色乎相

如曰臣不好色也王曰子不好色何若孔墨乎相如曰

古之避色孔墨之徒聞齊饋女而遐逝望朝歌而回車

譬於防火水中避溺山隅此乃未見其可欲何以明不

好色乎若臣者少長西土鰥處獨居室宇遼廓莫與為

娛臣之東鄰有一女子玄髮豐艷蛾眉皓齒顏盛色茂

景曜光起恒翹翹而西顧欲留臣而共止登垣而望臣
三年于茲矣臣棄而不許竊慕大王之高義命駕來東
途出鄭衛道由桑中朝發溱洧暮宿上宮上宮閒館寂
寞重虛門閣晝掩曖若僊居臣排其戶而造其堂芳香
郁烈黼帳高張有女獨處婉然在牀竒葩逸麗淑質艷
光覩臣遷延微笑而言曰上客何國之公子所從來無
乃遠乎遂設旨酒進鳴琴臣遂撫絲為幽蘭白雪之曲
女乃歌曰獨處室兮廓無依思佳人兮情傷悲有美

人兮來何遲日既暮兮華色衰敢託身兮長自私玉釵
挂臣冠羅袖拂臣衣時日西夕玄陰晦冥流風慘冽素
雪飄零閒房寂謐不聞人聲於是寢具既設服玩珍奇
金鑪薰香黼帳高垂茵褥重陳角枕橫施女弛其服表
其褻衣皓體呈露弱骨豐肌時來親臣柔滑如脂臣脈
定以內心正于懷信誓旦旦秉志不回翻然高舉與彼
長辭

大人賦

司馬相如

相如拜為孝文園令上既美子虛之事相如見上好仙因曰上林之事未

足美也尚有靡者臣嘗為大人賦未就請具而奏之相如以為列仙之儒居山澤間形容

甚臞此非帝王之仙意也乃遂奏大人賦

世有大人今在乎中州

大人以論天子也中州中國也

宅彌萬里今曾

不足以少留

彌滿也

悲世俗之迫隘兮竭輕舉而遠游

去

意也邱

乘絳幡之素蜺兮載雲氣而上

時掌

游

乘用也赤氣為

幡綴以

建格

胡略反

澤

大各反

之脩竿兮

格

澤之氣如炎火

白氣至天下大上銳脩長

建此氣為長竿

總光耀之采旄

旄葆也總係也係光耀之氣於竿以

為孫即今所
謂蠱頭也

垂旬始以為慘

所成反

今

旬始氣如雉雞見北斗旁張揖曰慘

疏也縣旬始於孫下以為十二疏

曳彗星而為髻

髻燕尾也世彗星綴著疏以為燕尾也

掉

徒釣反

指橋以偃蹇

居偃反

今

指橋隨風指靡也偃蹇委曲貌

又猗

依倚反

拈

年纓反

以招

韶搖

猗拈下垂貌跳踔也音蕭

搯攬

初咸反

搶

初衡反

為旌兮靡屈

其勿反

虹而為綢

直流反彗星為攬搶註髦首曰旌今以彗星代之靡

順也綢韜也以斷虹為旌杠之韜師古曰韜謂裏冒旌旗之竿

紅杳眇以玄

炫

湑面今

焱風涌而雲浮

晉灼曰紅赤色貌杳眇深遠也玄湑混合也言自絳幡以下衆氣色盛光采相

焱幽藹也

駕應龍象輿之蠖

於縛反

略委麗

力爾反

今驂赤螭

青蛇之蚘

反

一糾

蚘

反

力糾

宛

反

於元

延

音

延有翼

曰應

龍最

其神妙也

螭略委麗

步蚘蚘宛延行

貌

低

印

天

矯

裾

倨

以

驕

居

名

驚

五到

今

隆窮躍

反

鉅縛

以

連

卷

鉅圓反

裾直項也

驕驚縱恣也

詘

折委曲也

隆窮舉鬚也

躍跳也

連

卷句

蹄也

沛

艾

赳

反

古幼

蟻

反

火幼

仵

反

魚乞

以

伯

反

尹吏

礙

今

沛

艾

赳

反

火幼

仵

反

魚乞

以

伯

反

尹吏

礙

又音態

孱

反

士顏

顏

舉

也

孱

顏

不齊也

蹇

反

丑日

蹇

反

丑略

輻

逼

害

容

以

骹

反

古委

麗

反

力爾

今

反

容龍

體貌也

骹

麗

左右相隨

也

蜎

反

徒鉤

蜎

反

盧鉤

偃

寒

怵

黠

羹

反

丑若

以

梁

倚

蜎

也

蜎

反

徒鉤

蜎

反

盧鉤

偃

寒

怵

黠

羹

反

丑若

以

梁

倚

蜎

怵莫奔走也梁倚相著也糾蓼力糾反叫莽五到反踏以駿屈路兮曰糾蓼相

引也叫莽相呼也踏下也腰著蕤蒙踊躍騰而狂趨音

騰義蒙飛揚也踊躍跳也聲荇颯立荇諱歛翕歛至電過兮

煥然霧除霍然雲消荇颯飛相及也邪絕少陽而登太

兮與真人乎相求少陽東極太陰北極邪度東極而升北極也真人謂若士也將於太陰之

中真人至真之人也非指謂若士也互折窈窕以右轉兮橫厲飛泉以正

東飛泉飛谷也在崑崙山西南厲渡也悉徵靈圉而選之兮部署衆神於

於揺光揺光北斗柄頭第一星使五帝先導兮反太一而從陵陽

五帝五時太皞之屬太極大星一明者一太常居也陵陽仙人陵陽子明也令太一反其所居而使陵陽侍從

於左玄冥而右黔雷今玄冥北方黑帝佐也黔雷黔嬴已

黔嬴而見之前長離而後裔以出皇離靈鳥也長廝征或曰水神也

伯僑而役羨門今詔岐伯使尚方廝役也伯僑仙人王

上仙人羨門高也尚主也岐伯者黃帝大醫屬使主方藥也征伯僑者仙人姓征名伯僑非王子喬也郊祀志

征字作正其音同耳或祝融警言而蹕御今清氣氛而后說云征謂役使之非也

行祝融南方炎帝之佐也獸身人面乘屯余車而萬乘

今絳反子內雲蓋而樹華旗絳合也合五使句芒其將行

兮吾欲往乎南娛

許其反句芒東方青帝之佐也鳥身人面乘兩龍將行將領從行也歷

唐堯於崇山兮過虞舜於九疑

崇山狄山也海外經曰狄山帝堯葬於其陽九

疑山在零陵營道縣舜所葬也疑也山有九峯其形相似故曰九疑

紛湛湛

徒感其差

錯兮雜遝膠輶

葛以方馳遝重累也膠輶猶交加也雜

騷擾衝

尺勇反

從

相勇反

其相紛拏

女居反

兮滂

普郎反

淠

普備反

決

烏朗反

軋

於點反

麗以林離

街從相入貌

滂淠衆盛貌決軋

麗靡也林離揅攏也

軋

軋

軋

軋

軋

攢羅列聚叢以龍

來孔反

茸

而孔反

兮衍

弋扇反

曼流

爛

疹

式爾

式爾

反以陸離

疹衆貌一曰罷極也

陸離參差也龍

徑入雷

徑入雷

徑入雷

徑入雷

徑入雷

徑入雷

徑入雷

徑入雷

室之磳

反普萌

磷

反力耕

鬱律兮洞出鬼谷之堀

反口骨

暑

賄洛

反歲

反

魁

辰

雷室雷淵也洞通也鬼谷在崑崙北直北堀暑歲魁不平也磳磷

鬱律深峻貌

徧覽八紘而觀四海兮竭度九江越五河

九江在廬

江尋陽縣南皆東合為大江者河有九今越其五也五河五湖取河之聲合其音耳服晉說五河皆非也五河

五色之河也仙經說有紫碧絳青黃之河非謂九河之內亦非五湖也經營炎火而浮弱

水兮杭絕浮渚涉流沙

楚辭越

炎火之萬里弱水出張

于流沙杭船也絕度也浮渚流沙中渚也流沙沙與水流行也弱水謂西域絕遠之水乘毛車以度者耳非張

援弱水也又流沙但有沙流本無奄息慈極汜濫水娛水也言絕度浮渚乃涉流沙也

兮

奄然休息也蔥極蔥領山也在西域中

使靈媧鼓琴而舞馮夷

靈媧女媧也伏

義作琴使女媧鼓之馮夷河伯字也淮南子曰馮夷得道以潛大川媧音爪

時若曖曖將混

濁兮名屏

步丁反

翳誅風伯刑雨師

屏翳天神使也風也風伯字飛廉

西望

崑崙之軋沕

勿荒

呼廣反

忽兮

崑崙去中國五萬里天帝之下都也其山廣袤百里

高八萬仞增城九重面有九井以玉為檻旁有玉門開明獸守之軋沕荒忽不分明之貌直徑馳乎

三危

三危山在鳥鼠山之西與嶠山相近黑水出其南陂書曰導黑水至于三危

排闥闔而

入帝宮兮載玉女而與之歸

玉女青要乘七等也

登闔風而遥集

兮亢鳥騰而壹止

闔風山在崑崙闔闔之中遥也亢然高飛如鳥之騰也低徊

陰山翔以紆曲兮吾乃今日覩西王母皤

工老反

然白首

戴勝而穴處兮亦幸有三足鳥為之使

陰山在崑崙山西二千七百里

西王母其狀如人豹尾虎首蓬髮皤然白首石城金室穴居其中三足鳥三足青鳥也主為西王母取食在崑

崙墟之北山海經曰西王母梯几而戴勝低徊猶徘徊也勝婦人首飾漢代謂之華勝

必長生若

此而不死兮雖濟萬世不足以喜

昔之談者咸以西王母為仙靈之最故相

如言大人之仙娛遊之盛顧視王母鄙而陋之不足羨慕也

回車竭來兮絕道不周

不周山在崑崙東南二千三百里

會食幽都呼吸沆

胡朗反

瀝壑

兮餐朝

霞

幽都在北方淮南云八極西北曰幽都之門列仙傳陵陽子言春食朝霞者日始欲出赤黃氣也夏食沆

灌沆沆北方夜半氣也并咀才汝噍才笑芝英兮噤機

瓊華

芝草弱也榮而不實謂之英噤食也瓊樹生崑崙西流沙濱大三百圍高萬仞華藥也食之長生芝

之英也傑

反角甚侵

反子禁

尋而高縱兮紛鴻

反胡孔

溶

反弋孔

而上厲

傑印也鴻溶竦踊也

貫列缺之倒景兮

列缺天閃也人在天上不向視日月

故景倒在下也貫穿也陵陽子明經曰列缺氣去地涉一千四百里倒景氣去地四千里其景皆倒在下也

豐隆之滂

反善郎

滂

匹備反豐隆雲師也楚詞吾令豐隆乘雲分淮南子季春三月豐隆乃出

以將雨豐隆將雨故言騁游道而脩降兮驚遺霧而遠涉也滂滂雨水多也

逝

馳疾而遺霧在後也游游車也道道車也脩長也降下也言周覽天上然後騁車也循長路而下騁棄遺

霧而遠逝也
道讀曰導

迫區中之隘陝兮舒節出乎北垠

音銀舒緩也垠

崖遺屯騎於玄關兮

玄關北極之山

軼先驅於寒門下崢嶸而

無地兮

崢嶸深遠貌

上嶮遼

廓而無天

嶮廓廣遠也

視眩泯而亡

見兮聽敞悅而亡聞

泯音眇泯目不安也敞悅耳不諦也眩音縣

乘虛亡而

上遐兮超無友而獨存

賦奏天子大悅

擣素賦

班婕妤

測平分以知歲酌玉衡之初臨見禽華以庶

白交切獸似表切獸似

鹿色忽霜鶴之傳音佇風軒而結睇

達計切
睇視也

對愁雲之

浮沈雖松梧之貞脆豈榮雕其異心若乃廣儲懸月暉
水流清桂露朝滿涼衿夕輕燕姜含蘭而未吐趙女抽
簧而絕聲改容飾而相命卷霜帛而下庭曳羅裙之綺
靡振珠珮之精明若乃盼睐生姿動容多製弱態含羞妖
風靡麗皎若明魄之升厓煥若荷華之昭晰

之并切
明也調

鉛無以玉其貌凝朱不能異其脣若雲霞之邇月似桃
李之向春紅黛相媚綺組流光笑笑移妍步步生芳兩

靨如點雙眉如張頰

頰下也

肌柔液音性閑良於是投香

杵扣玫砧擇鸞聲爭鳳音梧因虛而調遠桂由真而響

沈散繁輕而浮捷節疎亮而清深含笙總筑

張六切比樂器也

玉兼金不墮不筮匪瑟匪琴或旋環而紆鬱或相參而

不雜或將往而中還或已離而復合翔鸞為之徘徊落

英為之颯沓調非常律聲無定本任落手之參差從風

颯

東京賦紛颯悠以容商唐呂向曰颯悠容商從風轉薄貌薛綜曰颯火花也玉篇曰暴風也

之近

遠或連躍而更投或暫舒而長歛清寡鸞之命羣哀離

鶴之歸晚當是時也鍾期改聽伯牙弛琴桑間絕響濮
上傳音蕭史編管而擬吹周王調笙以象吟若乃窈窕
姝妙之年幽閒貞專之性符皎日之心甘首疾之病歌
采綠之章發東山之詠望明月而撫心對秋風而掩鏡
閱紋練之初成擇玄黃之妙匹準華裁於昔時疑形異
於今日想嬌奢之或至許椒蘭之多術慙陋製之無韻
慮蛾眉之為愧懷百憂之盈抱空千里兮飲淚侈長袖
於妍袂綴半月於蘭襟表纖手於微縫庶見迹而知心

計脩路之遐負怨芬芳之易泄書既封而重題笥已緘而更結慙行客而無言還空房而掩咽

自悼賦

晦菴朱氏曰自悼賦者漢孝成班婕妤之所作也班氏世世以儒學顯婕妤以選入

宮貴幸嘗從游後庭帝召欲與同輦載辭曰觀古圖畫賢聖之君皆有名臣在側三代末王乃有嬖女今欲同輦得無近似之乎上善其言而止婕妤誦詩及窈窕德象女師之篇每進見上疏依則古禮後趙飛燕姊弟自微賤興婕妤稀復進見飛燕遂譖婕妤好祝詛主上考問婕妤好福對曰妾聞死生有命富貴在天修正尚未蒙福為邪欲以何望使鬼神有知不受不臣之愬如其無知愬之何益故不為也上善其對事遂釋然婕妤恐久終見危求得共養太后長信宮

因作賦以自悼歸來子以其詞甚古而漫尋
於楚人非特婦人女子之能言者是固然矣至
其情雖出於幽怨而能引分以自安援古以自
慰和平中正終不過於慘傷又其德性之美學
問之力有過人者則論者有不及也嗚呼賢哉
柏舟綠衣見錄於經其詞義之美殆不過此

班婕妤

承祖考之遺德兮何性命之淑靈登薄軀於宮闕兮充
下陳於後庭蒙聖恩之渥惠兮當日月之盛明揚光烈
之翕赫兮奉隆寵於增城

何音賀任也負也陳列也增城後宮之舍婕妤所居也

既過幸於非位兮竊庶幾乎嘉時每寤寐而索累息兮

申佩離以自思陳女圖以鏡監兮顧女史而問詩悲晨
婦之作戒兮哀寢閭之為郵美皇英之女虞兮榮任如
之母周雖愚陋其靡及兮敢舍心而忘茲

累息言懼而增累喘息也

離與禱同袿衣之帶也女子適人父結其禱而戒之故言自思也晨難尚書北雞之晨惟家之索言婦人不當預外事也寢寢如周幽王之嬖妾也見天問閭即詩所謂豔妻亦指寢如也郵過也皇娥皇英女英見女歌女尼據反女虞謂嫁於虞舜也任大任文王母如太如武王母也郵周皆叶時韻讀舍息也歷年歲而

悼懼兮閔蕃華之不滋痛陽祿與柘館兮仍襁褓而離

災豈妾人之殃咎兮將天命之不可求

陽祿柘館二觀名婕妤嘗就產

子數月失之災
求並叶滋韻

白日忽已移光兮遂晝莫而昧幽猶被

覆載之厚德兮不廢捐於罪郵奉共養於東宮兮託長

信之末流共洒掃於帷幄兮永終死以為期願歸骨於

山足兮依松栢之餘休

晝與暗同莫讀作暮或曰靜也
共居容反山足謂陵下休廕也

重曰潛玄宮兮幽以清應門閉兮禁闥扃華殿塵兮玉

階落

臺

中庭萋兮綠草生廣室陰兮帷殿暗房櫳

來東反

虛兮風泠泠感帷裳兮發紅羅紛綷

千賄反

綵蔡兮紉素

聲神眇眇兮密覲

靜

處君不御兮誰為榮

應門

正門也
高短闕也櫳

疏櫛也感動也繚衣聲

俯視兮丹墀思君兮履綦其仰視兮雲屋

雙涕兮橫流

叶綦韻丹墀赤地綦履下飾也雲屋言其黠對若雲也

顧左右兮和

顏酌羽觴兮銷憂惟人生兮一世忽已過兮若浮已獨

享兮高明處生民兮極休勉虞精兮極樂與福祿兮無

期綠衣兮白華自古兮有之

羽觴見招魂享受也休美也虞與娛同綠衣衛莊姜

失位自傷之詩白華周幽王中后被廢所作

逐貧賦

客齊隨筆曰韓文公送窮文柳子厚乞巧文皆擬揚子雲逐貧賦韓公進學解擬東

方朔客難柳子晉問篇擬枚乘七發正符擬劇秦美新黃魯直跋奚移文擬王子淵儵約皆極

文章之妙逐貧賦幾五百言文選不收初學記
所載纔百餘字今人蓋有未之見者輒錄于此
云


揚雄

揚子遁世離俗獨處左鄰崇山右接曠野鄰垣堅完終
貧且窶禮薄義弊相與羣聚惆悵失志嗔貧與語汝在
六極投棄荒遐好為庸卒刑戮是加匪惟幼稚嬉戲土
沙居非近鄰接屋連家恩輕毛羽義薄輕羅進不由德
退不受訶久為滯客其意若何人皆文繡余褐不全人

皆稻粱我獨藜藿貧無寶玩何以接歡宗室之宴為樂
不繫徒行負債出處易衣身服百役手足胼胝或耘或
耔霑體露肌朋友道絕進官凌遲厥咎安在職汝之為
舍汝遠竄崑崙之顛爾復我隨翰飛戾天舍爾登山巖
穴隱藏爾復我隨載沈載浮我行爾動我靜爾休豈無
他人從我何求今汝去矣勿復久留貧曰唯唯主人見
逐多言益嗤心有所懷願得盡辭昔我乃祖崇其明德
克佐帝堯誓為典則土階茅茨匪雕匪飾爰及季世縱

其昏惑饕餮之羣貧富苟得鄙我先人乃傲乃驕瑤臺
瓊室華屋崇高流酒為池積肉為嶠是用鵠逝不踐其
朝三省吾身謂余無讐處君之家福禍如山忘我大德
思我小怨堪寒能暑少而習焉寒暑不忒等壽神仙桀
跖不顧貪類不干人皆重蔽子獨露居人皆怵惕子獨
無虞言辭既罄色厲目張攝齊而興降階下堂誓將去
汝適彼首陽孤竹之子與我連行余乃避席辭謝不直
請不貳過聞義則服長與爾居終無厭極貧遂不去與

我遊息



文選補遺卷三十一